

# Ang Mga Sugo Ni Gabriel Kang Daniel



Panalanginan ka sa Ginoo, igsoon. Maayong buntag, mga higala. Mainit gayud, nga maania sa tabernakulo niining buntaga, apan mahimayaon sàb kaayo nga maania dinhi. Malipayon kaayo ko nga nakaanhi—nakaanhi tà karong adlaw para niini nga panerbisyo. Ug naipahibalo na man nga aduna ako’y pagtuon karon mahitungod niining *Kapitoan Ka Semana Ni Daniel*. Nga motakdo sa tanang uban pa sa Mensahe sa dili pa ako makadangat sa—sa Pito ka Selyo. Nga mao ang, Pito ka Selyo; Pito ka Hampak; Pito ka Trumpeta; Tulo ka Panghimaraut; ang babaye diha sa adlaw; ang paghingilin sa pula nga yawa; ang usa ka gatus kap-atan ug upat ka libo nga mga sinelyohan; nga magakahitabo tanan tali niini nga panahon. Ug nahunahuna ko nga hisgotan una kini.

<sup>2</sup> Bueno, mainit gayud. Mao nga dili nato tinguha nga magpabilin og dugay, kutob sa atong mahimo. Ug mao kini ang panahon, kasagaran, nga ang mga tawo, dili pirmi manimba. Ug, ilabina, nga silang tanan nga adunay naka-aircon nga mga lawak, ug uban pa, komportable sila. Kung aduna lang pud unta kita’y ingon niana, apan sa karon wala pa man ta’y ingon-ana.

<sup>3</sup> Pero daghan man gani sa atong mga unang amahan ang nanaglingkod ra kaniadto taliwala sa mainit nga adlaw. Pag mahunahuna ko nga mangayo’g pasaylo sa mga tawo tungod nga wala ta’y air-condition nga lawak, pirming nagabalik ang akong hunahuna didto sa Africa kon diin nanagpabilin gyud sila didto bisan dunay mga unos, ug ang mga kababayenan nga nakadunghay ang ilang buhok diha sa ilang nawong, nanagpabilin sila didto adlaw ug gabii, og dili gyud mohawa sa puwesto nga ilang nahimutangan; dili na gani mokaon, moinom, ni bisan unsa, basta makapabilin ra mismo didto aron lang madawat ang usa o duha, ka Pulong, sa Ginoo, sa karon ug unya.

<sup>4</sup> Mahunahuna pud nako ang Mexico kon diin mainit sàb kaayo, sa tinuod lang, nga bisan anaa ako sulod sa naka-aircon nga lawak pero nagapamaypay gihapon ko mismo, tungod sa kainit gayud. Ug makita ang mga tawo nga nanagpangadto didto sa alas nuebe sa buntag, didto niadtong dakung arena, ug wala pa gyu’y mga lingkoranan, para unta malingkoran. Mga tawong masakiton, nga grabe na ang sakit, naghimalatyon na, may sakit; kanser, tumor; ug ang mga inahan sàb nga may sakit, gagmay’ng, naghimalatyon nga mga bata ug tanan na, nga atua mismo didto taliwala sa mora’g nagabukal nga mainit nga adlaw, wala gayu’y

landong sa kon asa man, ug nanagsandiganay lang sa usa'g usa gikan sa alas nuebe sa buntag hangtud sa alas nuebe sa gabii, aron lang makapatalinghug og traynta minutos pinaagi sa usa ka maghuhubad, ug masaksihan sàb ang mga buhat sa Ginoo. Nanagpabilin mismo didto ug nanaghulat, nga nakasul-ob pa og dagkung mabug-at nga mga bisti, ingon-niadto ang ginasul-ob nila tingtugnaw man o ting-init. Hinoon kadto lang man gud ang aduna sila.

<sup>5</sup> Ug dayon mahunahuna ko usab ang mga atua didto sa mga kalasangan, kung unsa nga ginadala nila ang mga tawong masakiton, nga dili na gani makalihok pa. Ug didto sàb sa India, duna sila'y usa ka masakiton nga ipahimutang didto, dayon duna na pu'y usa nga ipahimutang ibabaw nianang usa, may usa ibabaw nianang usa pa, ingon niana, nga may sanla ug kung unsa na lang ang mga sakit; ilang guyoron sila, didto sa kadalanan, ug ipahimutang sila taliwala sa mainit, nga mora'g nagabukal, nga tropiko nga adlaw. Taliwala sa mga unos, ug nagapangidlap nga kilat, ug mga ingon-nianang butang, nanaghigda sila didto mismo taliwala sa mainit nga adlaw ug unos, ug tanan na, pero wala gyud namalhin o nagreklamo man, lang . . . ug aron lang nga makapatalinghug sa Pulong sa Dios, sa karon ug unya, usa ka butang alang sa ilang kalag. Busa nganong mangayo man tà og pasensya niining buntaga, nga aduna man gani ta'y atop ibabaw sa atong ulo, og mga bentilador nga nagatuyok? Mao nga maulaw gyud tà kung magreklamo pa kita mahitungod niini.

<sup>6</sup> Bueno akong mahinumduman dili pa lang dugay, sa usa ka isla, usa sa mga isla sa Habagatan nga Kadagatan, nagpahigayon man ko didto og usa ka panagtigum niadtong gabhiona. Ug, oh, dunay miabot nga usa ka unos. Oh, wala pa gyud ko sukad nakasaksi og ingon niadto nga unos, hilabihan gyud ang pagpangidlap sa mga kilat, nga mora na'g nahayagan ang tibuok probinsya. Ug nagahaguros og ayo ang hangin hangtud nga ang mga kahoy nangatumba na sa yuta. Ingon ko, "Bueno, sila'y . . . mas maayo pang hukason ko na lang ang akong amerikana, tungod basin wala gyu'y bisan usa nga manambong didto."

<sup>7</sup> Pero pagkataudtaud dunay gamay'ng sakyanan nga mihunong sa may pultahan, ug adunay nanuktok sa pultahan, nga andam na ba daw kong moadto.

Ug akong giingnan ang batan-ong lalaki, makasulti man siya og Ingles, ingon ko, "Aduna na ba diay og mga tawo didto?"

Miingon, "Dili na gani ka halos makaduol og pipila ka bloke sa maong lugar," didto sa usa ka dulaanan-og-baseball.

Ug miingon ko, "Ang buut mo bang ipasabot nga ang mga—mga tawo atua na didto bisan ingon niini," ingon ko, "ingon niini nga dunay unos?"

Ingon sila, "Gusto man gud nilang makadungog mahitungod sa Dios."

<sup>8</sup> Ug—ug busa miadto gyud ko didto. Ug aduna didto’y mga kababayan-an, mga batan-ong babaye, mga dalaga, nga wala nanag-agik-ik ug nanagpangatawa, ug nagpaburot og chewing gum, ug wala gani naghisgotanay bahin sa ilang uyab. Kondili nga sa matag Pulong, naminaw gayud sila Niini; ug nanagpuyo lang gyud, nanaglingkod lang ug naminaw. Naghimo ko og pagtawag sa altar, sa paghimo ko mismo og pagtawag sa altar, liboan ang mga nanindog, nga nanagdagayday ang mga luha sa ilang mga mata nga ingon niana, samtang nakataas ang ilang mga kamot ngadto sa Dios, nagatinguha og kalooy alang sa ilang kalag, mga batan-ong babaye ug mga lalaki, nga dise-siete, dise-otso anyos ang pangidaron. Pero karon medyo malisud na ganing aghaton bisan ang mga katigulangan sa pagpaminaw, nakita n’yo. Nagapakita lang—lang gyud nga wala kita’y angay’ng reklamohan. Salamat sa Dios! Oo, sir.

<sup>9</sup> Gustohon man natong magkaaduna og moderno nga pasilidad sama sa tanang uban pa sa Amerika, pero wala pa man kita’y mga ingon niana; mao nga agwantahan lang sa nato kung unsay anaa kanato.

<sup>10</sup> Karon, dunay diyutay’ng butang nga akong nahimatikdan nga buut kong buhaton pag-usab dinhi sa tabernakulo. Pila ba ang dunay mga Biblia? Ipataas ang inyong kamot. Maayo. Atong ablihan sa Mga Salmo 99 sa dili pa kita mag-ampo. Ginabuhat nato kini kaniadto, Igsoong Neville, pila na ka tuig ang milabay. Wala ko kabalo kung...Nakabasa na ba kamo og usa ka Salmo niining buntaga? [Nagaingon si Igsoong Neville, “Wala pa.”—Ed.] Wala pa. Mao nga gusto ko gayud, ang kongregasyon, nga mobasa og pipila ka Salmo.

<sup>11</sup> Niining buntaga pud, samtang nagalingkod ko sulod sa akong lawak tun-anan, nga nagapamalandong niining Mensahe ug Pulong, nahunahuna ko, “Abi nimo, maayo gyud nga—nga silang tanan pabasahon na usab og usa ka Salmo. Gusto kaayo nako kana.”

Ang hinungdan diay nga medyo naulahi ko, aduna man gud sila’y long distance nga tawag para kanako, gikan pa sa Cheyenne, busa mao kana’y hinungdan nga naulahi ako.

<sup>12</sup> Ug karon, samtang nagaabli kita niining Salmo, aduna sa ko’y himoon nga pipila ka pagpahibalo, nga bag-ohay lang gitunol sa ako. Mga Salmo 99 kana.

<sup>13</sup> “Sukad karon, ang tanang mga pagpahibalo mahitungod sa mga panagtigum dinhi sa tabernakulo, ug sa mga buluhaton, magagikan na sa opisina sa Jeffersonville. Ang si kinsa man nga gustong makahibalo sa mga panagtigum kinahanglan una nga ipalista, o ihatag ang ilang ngalan ug pinuy-anan, ug ibutang kana ibabaw sa pulpito inig tapos na sa panerbisyo unyang gabii. Adunay surat-pahibalo nga ipadala kaninyo sa tukma nga

higayon aron nga makapangandam kamo para sa pagtambong sa maong mga panagtigum.”

Kana’y, kung aduna man sa umalabot nga gustong mahibalo kon asa kami magapahigayon og mga panagtigum, nan aduna kami’y pamaagi nga nakahan-ay na, dinha sa opisina karon, ibutang n’yo lang ang inyong ngalan ug pinuy-anan dinhi. Ug padalhan ra namo kamo og kard, sa sayo nga panahon, aron nga masayran ninyo kung asa igapahigayon ang mga panagtigum, ug tingali’g ang mga hilisgotanan usab, ug uban pa, kung magkaaduna man gani kamo og kahigayonan. Nakita n’yo, kung wala man gud kamo’y opisyal nga gigikanan sa maong pahibalo, may usa nga mosulti og *ingon-niini* ug may usa pud nga mosulti og *ingon-niana*, nan dili gyud kamo—kamo mahibalo sa insakto, nakita n’yo. Busa inyong . . . Isulat n’yo lang ang inyong ngalan ug pinuy-anan ug ibutang kana dinhi, ug si Billy Paul na ang mokuha niana ug ang magpadala sa maong kard.

<sup>14</sup> Karon, naipangutana usab, diay, kung magkaaduna pa ba . . . “Igsoong Branham, magkaaduna ka pa ba og mga panerbisyo sa pagpang-ayo dinhi sa tabernakulo, nga dunay mga pagpang-ila?” Dili. Dili. Ang mga pagpang-ila pagahimoon kana sa—atong uban pa nga miyembro sa hunta. Ngani ania man kanato karon si Igsoong Neville nga adunay gasa sa pagpropesiya, nagapropesiya siya sa mga may sakit ug ginapahibalo kanila ang mga butang nga kinahanglan nilang masayran. Ug aduna pud kita’y igsoon nga ginganla’g Higg- . . . Higginbotham, usa sa . . . usa ka tinugyanan kaniadto, nga matinud-anon gayud nga nag-alagad sa hunta. Wala ko siya nakita karong buntaga, apan sa kanunay aduna siya’y gasa sa pagsulti og laing mga pinulongan. Ug may usa sàb ka gamay’ng babaye nga ginganla’g Arganbright, hiligugmaong igsoong babaye nga aduna pu’y gasa sa paghubad og mga pagsulti sa laing mga pinulongan.

<sup>15</sup> Ug kini nga mga mensahe napamatud-an na nga iya gyud sa Dios, tungod sa tinuod lang ang mga niini dili man ingon nga wala sa kahan-ayan, kondili kini’y anaa gayud sa kahan-ayan. Ug sa diha nga hinay-hinay nang magkadaghan kini nga mga gasa, nan paningkamotan nato nga—nga himoon ang . . . nga ihan-ay kini mismo sulod sa iglesia, sumala sa pamaagi sa pagbuhat niini. Ug kinahanglan kong siguradohon sà ang mga niini sa dili madugay, aron nga ang—nga ang—ang mga panagtigum bug-os gayud nga maipahigayon diha sa kahan-ayan nga iya sa Ginoo, kutob sa atong bug-os nga mahimo.

<sup>16</sup> Apan kining minahal nga mga tawo, sumala sa sulti sa akong silingan, nga si Mrs. Wood, nga adunay mikropono nga nakakonekta dinhi, ug may usa ka teyp dinha sa luyo, para iteyp ang panagtigum, aron lang marekord og tuyo kini nga mga mensahe, ug kopyahon kini, ug hibaloon kung ang mga niini’y husto ba o dili. Kita n’yo? Ingon niana niya kini ginasusi. Naila

ko man si Mrs. Wood ingon nga usa ka matinud-anon nga babaye. Ug ginasulti niya kanako ang daghang mga butang nga naisulti ko, nga nagakatuman gayud.

<sup>17</sup> Bueno, mapasalamatan kita tungod niana. Kahupayan gyud para nako ang makauli na dinhi! Pag makauli na man gud ko, bueno. . . Makapakapoy gayud kanako ang pagpang-ila nga iya na sa propeta nga bahin, ug busa, nagpadala pud ang Dios kanako og kahupayan para niana, pinaagi'g pagpropesiya, ug pagsulti sa laing mga pinulongan, ug paghubad, ingon nga pagpropesiya. Tungod, pagpropesiya man, ang pagsulti og laing mga pinulongan. Ngani adunay duha ka managlahi nga tawo ang nagapropesiya. Ang usa ang nagasulti, ang laing usa usab ang makasabot sa dili-mailhan nga mga pinulongan nga ginasulti sa usa, kana'y bug-os gyud nga pagpropesiya. Ug karon atong. . . Aduna man kita niana sa matag adlaw, sa matag panagtigum dinhi pag nagapahigayon kita og linya sa pagpaampo sa panagtigum.

<sup>18</sup> Karon, basin unya'g adunay mangutana, kon. . . mahitungod sa maong gasa. Oo, aduna sa gihapon ko niini. Apan ang paagi man gud, ginagamit ko lang kini, sa mga personal nga pagpakighinabi, nga akong ginahimo. Ug, aron makakuha mo og eskedyul niini, sa tan-aw ko gibutang na nila kini sa paskinan dinha sa likod, ang bahin sa pagkuha og permiso ug para maihan-ay n'yo ang petsa, kang Billy Paul, ang akong anak, kon dinhi ba kaha o sa mga panagtigum human niini. Pero kon dinha man sa mga pagpangmisyon, o asa man, kinahanglan aduna kamo'y gamay'ng kard nga ihatag ni Billy Paul sa inyoha. Kung aduna ma'y sa kung unsang butang sa kinabuhi nga dili n'yo arang masabtan, ug wala mahibalo kung unsaon nga makalingkawas niana, ug ginatinguha n'yo ang kaalam sa Ginoo, nan. . . Pakigkita mo kang Billy Paul, nga akong anak, nga mao'y sekretaryo, ug hatagan niya kamo og gamay'ng kard, ug mag-eskedyul para ninyo og petsa, sa usa ka higayon.

Ug dayon pag ipahigayon na namo ang mga pagpakighinabi, nan mao kana ang higayon nga mosulod kita, ikaw lang ug ako. Ug kung mga babaye man, nan mosulod kamo uban nako ug ang akong asawa. Ug pagkahuman kamo. . . Atong hibaloon, ug hangyoon ang Ginoo ug mangamuyo Kaniya kung unsa ang kinahanglan n'yong buhaton.

<sup>19</sup> Karon, sa ubang, gagmay nga mga kaso ug uban pa nga sama niana, igahatag na kana kang Igsoong Neville, ug Igsoong Higginbotham, ug kang Igsoong babayeng Arganbright, ug sa uban pa nga nagasulti sa laing mga pinulongan ug nagahubad niana, nga mga ania pud sa iglesia.

<sup>20</sup> Busa, mora kita og anaa sa pagpanaw. Nagatoo ko nga si Jetro kadtong, miingon kang Moises usa niadto ka adlaw, kita n'yo, "Mokuha kita og pipila ka mga anciano." "Ug gikuha ang

Espiritu sa Dios gikan kang Moises ug gibutang sa kapitoan ka mga anciano, ug nanagpropesiya sila. Apan sa kang Moises lamang ginadala ang dagku ug malisud nga mga butang.” Karon, dili man tà si Moises, dili usab kita ang maong mga anciano, apan kang Jehovah nga Dios ra gihapon kita nagapangalagad, nga adunay mao ra nga Haliging Kalayo nga nagapanguna kanato paingon sa Yutang saad.

Busa, ingon niana, oo, adunay uban pa, sa mga panagtigum ug aduna pu’y interpreta-... Aduna sàb og mga pagpangila. Mao nga magahatag kana kanako og kahigayonan nga mag-ampo ug magtuon, para sa mga adlaw nga hingsayran kong magkaaduna og mga pagpakighinabi, ug makapangandam gayud para sa mga niini.

<sup>21</sup> Karon timan-i n’yo, si Billy Paul Branham, ang atong sekretaryo sa natad sa pagpangmisyon, ang maga... Anaa sa... Nakapaskin na ang pahibalo dinha sa paskinan sa luyo, ang mga tinugyanan ang nagbutang niana. Nakadawat man gud ko og sinulat dinhi para imantala kana, ug para masultihan ang mga tawo nga mabasa nila kana dinha sa paskinan, inig manggawas na.

<sup>22</sup> Bueno, karon, niining buntaga aduna kita’y mahinungdanong leksyon, ug unyang gabii paningkamotan natong ipadayon kini. Ug, kon itugot sa Ginoo, sa sunod Dominggo, usa na usab, mahitungod niini. Wala gani ako mahibalo nga pagkahalawom diay niini hangtud nga gitun-an ko kini. Ug usa gihapon kini ka misteryo para nako, hangtud karon, ug mao nga nagasalig gayud ako sa Ginoo.

<sup>23</sup> Karon, kamo nga adunay mga Biblia, atong ablihan sa Mga Salmo 99, 99. Ug basahon ko ang ika-1 nga bersekulo, basahon sa kongregasyon ang ika-2 nga bersekulo, dayon dungan kitang tanan nga basahon ang ulahing bersekulo. Dire-diretso ra tà; ako, sa ika-1; ang kongregasyon, sa ika-2; ako, sa ika-3; ang kongregasyon na pud, sa ika-4; hangtud sa ulahing bersekulo, ug dayon dungan natong basahon kini. Manindog kita samtang magabasa tà sa Pulong sa Dios.

*Ang GINOO nagahari; papanguroga ang mga katawohan: siya nagalingkod ibabaw sa mga querubin; pauyoga ang yuta.*

*Ang GINOO mao’y daku sa Sion; ug siya mao’y labing hataas sa tanang mga katawohan.*

*Padayega sila sa imong daku ug makalilisang nga ngalan; balaan man siya.*

*Ang kalig-on sa hari nahigugma usab sa justicia; ikaw nagatukod sa pagkatul-id, ikaw nagapatuman og justicia ug pagkamatarung diha kang Jacob.*

*Bayawa ninyo ang GINOO nga atong Dios, ug managsimba kamo didto sa tumbanan sa iyang mga tiil; balaan man siya.*

*Si Moises ug si Aaron anaa sa taliwala sa iyang mga sacerdote, ug si Samuel lakip kanila nga nanagsangpit sa iyang ngalan; nanagsangpit sila sa GINOO, ug siya mitubag kanila.*

*Siya misulti kanila diha sa haligi nga panganod: nanagbantay sila sa iyang mga pagpamatuod, ug sa mga kabalaoran nga iyang gihatag kanila.*

*Ikaw mitubag kanila, Oh GINOO nga among Dios: ikaw mao ang Dios nga nagpasaylo kanila, bisan ikaw nagpanimalus sa ilang mga buhat.*

*Bayawa ninyo ang GINOO nga atong Dios, ug managsimba kamo didto sa bungtod nga balaan; kay ang GINOO nga atong Dios balaan man.*

24 Iduko nato ang atong mga ulo.

Tinuod gyud, Ginoo, nga kini nga mga Pulong gisulat ug gihimo sa Imong alagad, nga si David, diha sa usa ka Salmo alang Kanimo. Nagapuyo Ka taliwala sa mga Querubin. Balaan Ikaw, ug ang Imong bungtod balaan. Itugot nga managduol kami nga ang among mga kasingkasing nasablitan sa Dugo ni Ginoong Jesus, nga may putli nga konsensiya, ug may pagtoo ug kasiguradohan nga kami nagaduol sa Presensiya sa among Dios. Itugot nga magmatinahuron gayud ang tanang mananambong niining buntaga. Ablihi ang among mga igdulogog sa panabot. Manulti Ka kanamo, diha sa kaalam, aron nga among masayran kung unsaon namo sa pagminatarung niining mga panahona ug diha sa Imong Presensiya.

25 Ginapangamuyo sàb namo Kanimo, among Dios, nga ipadayag Mo kanamo kining mga tinagong butang nga dugay nang gililong sulod sa niining daghang mga katuigan, samtang nagaduol kami sa usa sa pinaka tinuod, halangdon nga mga Pulong. Gipamulong Mo man kini kaniadtong ania Ka pa sa yuta, ug miingon, “Ang nagabasa, pasabta.” Busa, bug-os og magrasyahon kaming nagaduol Kanimo, Ginoo, ug ginatinguha ang Imong kaalam, ingon nga wala ako masayod kung unsay igasulti. Gihan-ay ko lang dinhi ang pipila ka Kasulatan, pero maalampoon ako ug bug-os nga nagasalig Kanimo alang sa tubag, kay wala kami’y laing katuyoan kondili ang mailhan gayud namo ang panahon nga among gikinabuhian, aron nga makapangandam kami alang sa dagkung mga butang nga anaa sa umalabot. Itugot Mo unta kini para kanamo, Ginoo? Sa Ngalan Niya Nga nagtudlo kanamong tanan nga kami’y kinahanglan mag-ampo nga ingon niini:

Amahan namo Nga anaa sa Langit,  
Pagabalaanon ang Imong Ngalan.

Umanhi ang Imong Gingharian. Pagabuhaton ang Imong kabubut-on dinhi sa yuta, maingon sa Langit.

Hatagi kami karon sa pagkaon namo sa matag adlaw.

Ug pasayloa kami sa among mga sala, maingon nga nagapasaylo kami sa mga nakasala kanamo.

Ug ayaw kami itugyan sa mga panulay, kondili luwasa kami sa kadautan; kay Imo ang Gingharian, ug ang gahum, ug ang himaya, hangtud sa kahangturan. Amen.

26 Makalingkod na kamo. Karon, kung aduna man sa mga kalalaken-an nga gustong hukason ang ilang amerikana, gawasnon kamo nga buhaton kana. Ug sa mga nagatindog dinha sa—sa kilid sa dingding, kung manghawoy na ang inyong mga tiil, bueno, gawasnon kamo nga mobalhin og puwesto.

27 Ug karon, nahunahuna ko, nga basin gusto na sa mga bata nga moadto sa ilang mga lawak tun-anan, o gipagawas na ba sila? [Nagaingon si Igsoong Neville, “Wala, wala ra sila gipagawas. Dili man gud nato magamit ang mga lawak karong buntaga, tungod sa kadaghan sa mga tawo.”—Ed.] Ginaingon sa pastor nga napuno na kono ang mga lawak tungod sa kadaghan sa mga tawo, mao nga dili sa kita makapahigayon og Sunday school para sa mga gagmay’ng bata. Ug malipay pud kami kung kamo nga gagmay’ng mga bata karon makigtimbayayong kanamo, tungod karong buntaga magkaaduna kita, magasugod ta og usa ka halangdon, maanindot kaayo nga Mensahe nga sigurado ako nga mahimong mahinungdanon gayud para sa inyong amahan ug inahan, ug sa inyong mga minahal sa kinabuhi nga ania dinhi, ug bisan kaninyo usab nga mga gagmay’ng bata. Busa, hisgotan nato kini sa matinahuron gayud nga paagi.

28 Kon itugot sa Ginoo, niining buntaga atong hisgotan ang hilisgotanan mahitungod sa kapitoan ka semana ni Daniel. Ug niining buntaga hisgotan sab nato ang pagkabihag ni Daniel, ug ang paglupad ni Gabriel aron tudloan siya mahitungod sa umalabot. Samtang nagaampo si Daniel kaniadto, si Gabriel, ang Manulonda, miabot aron tudloan siya.

Unyang gabii, gusto kong hisgotan ang mahitungod sa unom-ka-pilo nga katuyoan sa Iyang pagduaw, unom ka managlahi nga mga hilisgotanan nga pagahisgotan ko unyang gabii, kung unsa ang giadto ni Gabriel.

29 Pagkasunod Dominggo sab, kon itugot sa Ginoo, gusto kong ipahayag ang hinungdan ug ang panahon sa Pito ka Kapanahonan sa Iglesia, ug kung unsa mismo ang panahon sa

mga niini, ug kung asa na kita sa karong panahon. Kana'y sa sunod Dominggo, kon itugot sa Ginoo.

<sup>30</sup> Karon, ang hinungdan niini. Nagdala ko og pipila ka diyutay'ng mga sinulat gikan sa nangagi kong pipila ka Mensahe. Ug niining buntaga gusto kong sublion kini, tungod kay ginarekord baya kini sa magnetikong teyp nga mokaylap sa tibuok kalibutan, sa daghang mga nasud. Ug, sa kanunay, ang hinungdan nga ginasubli ko kini, tungod basin aduna man gu'y tawo nga makadungog sa teyp sa una pa lang nga higayon, ug dili na hinoon makasabot sa kung unsay buut kong ipasabot kung mopahinungod ako sa usa pa ka butang.

<sup>31</sup> Sa karon pipila na ka bulan natong ginatun-an ang mahitungod sa Basahon sa Pinadayag, Ang Kapadayagan Ni Jesus Cristo. Nahuman na gani nato ang mga kapanahonan sa iglesia. Ang unang tulo ka kapitulo sa Pinadayag mao man ang mga kapanahonan sa iglesia. Dayon gilalin si Juan diha sa ika-4 ug ika-5 nga kapitulo, ug gipakita sa iyaha ang mga butang nga—nga mahitabo sa umalabot. Bueno, sa ika-6 nga kapitulo, mikanaug na siya'g balik sa yuta, aron makita ang mga butang nga magakahitabo gikan sa ika-6 nga kapitulo, sa ika-1 nga bersekulo, hangtud sa ika-19 nga kapitulo ug sa ika-21 nga bersekulo. Dinhi mahisgotan pud ang mga Selyo, ang mga Hampak, ang mga Kagul-anan, ang mga dulon, ang—ang babaye diha sa adlaw, ug ang pagtambog sa mapula nga dragon, ang pagselyo sa usa ka gatus kap-atan ug upat ka libo, ug tanan na niining mga butanga.

<sup>32</sup> Ngani usa gayud kini ka semana nga grabeng pagtuon. Kagahapon, sa tibuok adlaw, halos wala gyud ko migawas sa lawak, sa pagpaningkamot nga magtuon. Ug tungod nga may kung unsang butang man gud niadtong ulahing higayon, nga daghan sa mga karaan na dinhi, ang akong natudloan, nga miingon lang ko, “Lakip na niini ang kapitoan ka semana ni Daniel,” pero wala ko pa kini mahisgoti, para maisaysay kini. Apan niining higayona, pinaagi sa grasya sa Dios, gibuhat ko na mismo nga mangamuyo og grasya sa atubangan sa Dios, aron maihatud ko kini sa mga tawo. Ug gani dinhi duna ko'y hingkaplagan nga mga butang nga wala pa gyud ako'y hingsayran ni usa ka butang mahitungod niini.

<sup>33</sup> Ug, ingon nga, ako—akong ginabasa ang libro ni Dr. Larkin, ang libro ni Dr. Smith, ang mga opinyon ni Dr. Scofield, og ang nagkalainlaing mga komentaryo gikan sa mga kalalakenan sa bisan asa, ug bisan pa niana dili ko gihapon maitakdo nga husto ang ilang mga pahayag. Kita n'yo? Busa, niini nga semana nagplano ko, nagsige na man ko'g bisita sa libraryo sa Kentucky, para mangita og pipila ka karaang astronomiya bahin sa mga kalendaryo ug mga panahon, ug hulamon gikan sa mga libraryo, ug uban pa, ang tanang karaang mga libro nga mahulam ko, ug kung unsa man ang diyutay kong mahimo, ug

samtang nagasalig ako nga maalamoon kang Jesus Cristo nga ipadayag kini kanako.

Tungod kay, dili man gud ko gustong moingon nga, “Nasayod na ako *niini*, ug nasayod na ako *niana*.” Hingsayran man Niya ang akong kasingkasing. Nagapaminaw Siya kanako. Kondili ginatinguha ko gayud kini, aron nga mahayagan ang Iyang mga katawohan, busa nagatoo ako nga Iya gyud kining ihatag kanako. Wala pa ako masayod sa karon, apan nagasalig gyud ako Kaniya para sa sunod Dominggo, tungod kay kana man ang labing mahinungdanon nga bahin, ang sa sunod Dominggo, ang masayran ug maihan-ay ang maong kapitoan ka semana.

<sup>34</sup> Ang matag usa aduna may nagkalainlaing pagkahan-ay. Ug sa dihang mahibaloan mo na, itakdo mo man ang tanan niini, og kon dili kini maipahayag nga husto, nan moresulta gyud kini nga dili husto. Dili man kana puede. Ug, busa, ako—tingali’g dili ko pa kini maihan-ay nga husto, pero nagasalig gayud ako sa Ginoo para niini.

<sup>35</sup> Ug akong mahinumduman si Solomon usa niadto ka higayon nga nag-ampo ug nangamuyo sa Ginoong Dios kung mahimo ba nga hatagan Niya siya og kaalam, dili para sa iyang kaugalingon mismo, “dili para sa dugang nga mga adlaw, dili para sa mas hataas nga kinabuhi, dili pud mga bahandi,” kondili ang makabaton siya mismo og kaalam aron mahibalo kung unsaon niya sa—sa—sa paghukom ang katawohan sa Dios. Ug tuod man gipasidunggan sa Dios kadto nga pag-ampo, ug gihatag kang Solomon ang maong kaalam, tungod kay para man kadto sa Iyang katawohan. Ug mao kana’y hinungdan kon ngano nga nagapangamuyo ako sa Dios nga ipahibalo kanako kung unsay buut ipasabot niining kapitoan ka semana, tungod kay nasayod ko nga mao kini mismo ang eksaktong kalendaryo para sa kapanahonan nga atong gikinabuhian. Ug, busa, gusto kong masayran kini; dili nga para sa kaugalingon ko mismo, ako’y . . .dili para sa kaugalingon ko. Siyempre, gusto ko man nga masayran kini. Dili gyud ingon nga ginasulti ko kini sa ingon niana nga, “Dili para sa akong kaugalingon,” tungod kay ginatinguha man pud nako mismo kini. Gusto kong mahibalo, tungod kay gusto ko masayran kon diin na kita nagapuyo ug kung unsa na nga panahon ang atong gikinabuhian. Ug, busa, mahibaloan ko nga gikahatag gyud kini.

<sup>36</sup> Ug duna pu’y uban nga nagbanabana niini, ug nahunahuna nila nga sa kaniadto pa kono kini. Ngani may usa ka tawo, sa akong nabasa, nga ang ingon natapos na kono ang tanan niadto pang 1919, ang kapitoan ka semana. Bueno, dili man ingon niana.

Tungod, human sa kapitoan ka semana, human mismo sa kapitoan ka semana, tapos na man ang tanan. Busa kita—dili nato . . .Gusto gyud natong mahibaloan ang Kamatuoran. Ug

mao nga nagapangamuyo ako sa Dios nga ihatag kanako ang Kamatuoran.

<sup>37</sup> Karon, aron pamatud-an kini, balikan tà, gusto kong hisgotan sà og diyutay ang natun-an na nato. Ug, busa, aniyay pipila ka sinulat nga akong gisulat, nga natun-an nato sa ika-5, sa ika-4 ug ika-5 nga kapitulo, aron nga masabtan pud sa mga tawo. Una, sa dili pa nato hisgotan kini, gusto kong sublion sà kana, aron inyong masabtan gikan sa ika-4. . .

Karon, timan-i n'yo, nga ang ika-3 nga kapitulo mao ang Kapanahonan sa Iglesiang Laodicea, ug ang Iglesia paglalainon sa katapusan na sa Laodicea.

<sup>38</sup> Bueno, gisulayan kong isaysay ang usa ka butang mahitungod niini ngadto sa akong asawa. Kauban ko si Becky, ang anak kong babaye, nga nagkuha og nagkalainlaing matang sa diksyunaryo ug uban pa nga puede namong makuha. Pero walay tubag nga nahatag ang mga niini. Aduna ko og diksyunaryo mahitungod sa Biblia. Aduna pud ko'y karaang Griyegong diksyunaryo. Ako—aduna ko og—og Websters ug daghang uban pa, nga modernong mga diksyunaryo. Pero wala gyud ni usa man sa mga niini ang nakahatag og . . . nakahatag og mga pulong o tubag, man lang.

<sup>39</sup> Miingon ang akong asawa, “Sa unsa mang paagi nga malauman mo ang atong mga kaigsoonan, nga kabus lang nga mga tawo, ug daghan pud kanila ang walay-edukasyon sama nato, nga masabtan ang ingon nianang butang?”

Ingon ko, “Ang Dios man ang magahatag og tubag.”

<sup>40</sup> Bisan unsa pa ka komplikado kini, mahimo man sa Dios nga hatagan kini og katin-awan ug himoon kining simple. Kay kita man ang. . . usa ka bahin sa maong mga tawo nga nagapangandoy, og nagaampo alang nianang adlaw ug nianang taknaa. Ug nakasentro na ang atong mga mata ngadto sa Langit, ug nagahulat gyud kita alang sa Iyang Pag-abot. Ug sigurado gayud ako nga ipakita Niya kanato. Hinoon, dili igasulti niini ang adlaw o ang takna, tungod wala ma'y tawong mahibalo niana, apan sigurado gayud nga igasulti niini kanato ang adlaw sa semana nga atong gikinabuhian, kung masabtan lang nato kini.

<sup>41</sup> Karon, diha sa ika-4 nga kapitulo, sa gilayon gilalin si Juan, pagkahuman sa Iglesia. Si Juan, sa iyang pagkayab, nakita niya ang tibuok kapanahonan sa Iglesia. Dinha ko gustong mohunong ùsa, sa makadiyut lang, aron moingon, nga: ang daghang mga tawo nga nagapaabot og usa ka dakung, makahibulongan, og gamhanang butang nga mahitabo, sa kapanahonan sa Gentil, mga sayup gayud. Tungod ang kapanahonan sa Iglesia, ug ang tanan nga mahitabo sa panahon sa paghari sa Gentil, nahisulat man gikan sa Pinadayag 1 hangtud sa Pinadayag 3, lakip tanan. Dayon gisakgaw ug gidala paitaas ang Iglesia, ug ang tanang

uban pa niini, hangtud sa ika-19 nga kapitulo, nga mao na mismo ang mahitabo sa kaliwatan sa mga Judio, human nga ang Iglesia gilalin na. Ug mao na kana ang panahon sa dakung Kasakitan, wala na sa mga Gentil; ang pagpamatay na lang, ug uban pa, inig mahisgotan na nato ug hibaloon kana.

<sup>42</sup> Apan ang Iglesia, Mismo, human nang gisakgaw diha sa ika-13...Diha sa ulahing bersekulo sa ika-3 nga kapitulo sa Pinadayag, sa dihang matapos na ang Kapanahonan sa Iglesiang Laodicea, nga mao ang kaulahian.

<sup>43</sup> Ug gitun-an na man nato ang matag kapanahonan sa iglesia, ang matag panahon, ang matag butang nga nahitabo, ang matag bitoon, ang matag mensahero, ang ilang kinaiyahan, ang ilang gibuhat, ug gisubay kini mismo diha sa kasaysayan hangtud sa pinakaulahi, gidrowing pa gani kini diha mismo sa maong hulagway, dinha sa kilid sa bungbong. Ug sa dihang nahuman na kita, miabot ang Balaang Espiritu ug naghimo og lingin sa mao ra mismong butang diha sa bungbong, ug gipadayag Niya Mismo kini dinhi mismo kanatong tanan.

<sup>44</sup> Karon, sa pagpahayag niini, nagasalig ako, nga sa pagtapos niini moabot pud Siya nga dala ang usa ka butang nga kahibulongan ug ipakita kanato pag-usab nga ania na kita sa katapusang panahon.

<sup>45</sup> Pila man kaninyo ang nakadungog kang Kennedy...sa gipamulong ni Presidente Kennedy, mga komento ug uban pa? Pila man ang nakadungog sa niini nga pagpanagna, nga sa ika-1 sa Enero, gipanagna nga ang Estados Unidos ug ang Rusya pareho na konong mamahimo nga abo sa bulkan? Mao lang man kana ang atong gikinahanglan. Mamahimong ulahi na gyud kaysa atong pagdahum. Kita n'yo? Busa, kung haduol na kaayo kita nga bisan ang mga kalalaken-an niining kalibutana nagapanagna na niining makuyaw nga butang nga mahitabo, nan kinahanglan magmaigmat kita, ang tanan angay nga nakahan-ay gayud sumala sa panahon, ang tanang mga pagsugid angay nga nahimo na, og ang tanan nahilandam na, tungod kay wala gyud ta masayod kung unsang orasa kita pagatawgon sa atong Ginoo. Ug sa dihang magtawag na Siya, "Saka ngari," kinahanglan andam gyud kamo. Tungod mahitabo baya kini sa takna nga wala ninyo damha.

<sup>46</sup> Nagakawala na sa karon ang dakung Pentecostal nga rebaybal. Pero makita pud nato kini sa bisan asa, ang ulahing mahimayaong paglihok. Ingon nga mikaylap na ang Mensahe. Nahilandam na gyud ang tanan-tanan karon, og nagapaabot na lang. Ang Iglesia selyado na. Ang mga dautan nahimong mas grabe pa ka dautan. Ang mga kaiglesiahan nahimo nang mas labi pa ka pormal. Ang mga balaan mas napahiduol pa sa Dios. Ang mga gasa sa Espiritu hinay-hinay nang nagkadaghan diha sa gagmay'ng mga pundok. Ania na kita sa katapusang panahon.

Oh, gusto ko gayud ang maong awit nga atong ginaawit kaniadto sa simbahan.

Ginahulat ko ang pag-abot nianang  
malipayong adlaw sa Milenyum,  
Sa dihang moabot na ang atong  
mapanalanginong Ginoo ug ang nagahulat  
Niyang Pangasaw-onon pagasakgawon na;  
Oh, ang kasingkasing ko nagatuaw,  
nagatinguha alang nianang adlaw sa matam-  
is nga kagawasan,  
Sa dihang ang atong Manluluwas mobalik na  
pag-usab sa yuta.

<sup>47</sup> Nagahulat gayud tà alang nianang taknaa! Bueno, diha sa ika-5 nga kapitulo ug sa ika-5 nga mga bersekulo, atong hingsayran, sa nahauna natong leksyon, diin naghisgot kita mahitungod sa Kabanay'ng Manunubos, nga atong nahibaloan nga mao si Cristo. Gitipo kadto kang Ruth: ingon nga nagdesisyon si Ruth; nag-alagad si Ruth; og nagpahulay si Ruth. Ang pagdesisyon, mao ang pagpamatarung; ang pag-alagad, ingon nga pagpangandam niya sa iyang kaugalingon, nga mao ang pagpabalaan; ang pagpahulay, mao ang makauban na ang Balaang Espiritu, hangtud nga mahitabo na ang pang-Kasal nga Panihapon. Pagkaanindot gayud!

<sup>48</sup> Ngani ang Iglesia miagi man kang John Wesley, sa pagpamatarung, o...kang Martin Luther, sa pagpamatarung; dayon kang John Wesley, sa pagpabalaan; dayon sa Pentecostal, ang bautismo sa Balaang Espiritu; ug sa karon, nagapahulay, og nagahulat na lang sa Pag-abot sa Iyang Ginoo. Pagkahingpit gyud!

<sup>49</sup> Ang atong Kabanay'ng Manunubos, husto gyud ang mga anciano sa dihang gitawag nila Siya nga usa ka Cordero, nga duol nang mamahimong usa ka Leon, ingon nga maghuhukom. Usa Siya ka Cordero, kabalo na mo, nga dala-dala ang Basahon nga selyado og pito-ka-selyo. Sa dihang gikuha na ang Basahon, nan tapos na ang tigpataliwalang buluhaton.

<sup>50</sup> Karon, diha sa ika-3 nga kapitulo, gisakgaw na ang Iglesia, apan ang pagtubos igapadayag pa, kung sa unsang paagi nga ang Iglesia gitubos—gitubos, ang kapadayagan sa kung unsay nahitabo niadtong kapanahonan sa Iglesia. Kita n'yo, gisakgaw na ang Iglesia, busa ginapakita Niya karon, diha sa ika-5 nga kapitulo, kung giunsa Niya pagbuhat kadto, kung unsay nahitabo kaniadto, og kung giunsa Niya pagselyo ang Iglesia. Ang kapadayagan mahitungod sa Iyang Ngalan; ang bautismo sa tubig, gamit ang Iyang Ngalan; ang Kinabuhing Walay Katapusan; ang pagkawalay Eternal nga impiyerno; ang binhi sa serpente; ang Eternal nga kasiguradohan; ang tanan nang gibantog nga mga doktrina, og ang pagpili-nang-daan sa Iglesia

nga gikapadayag ra ngadto sa Iglesia. Iyang ginapakita kung giunsa Niya pagbuhat kini.

<sup>51</sup> Karon, ingon nga gihatag ngadto sa atong Kabanay ang Basahon sa Katubsanan nga selyado og pito-ka-selyo gikan sa orihinal nga Tag-iya. Amen! Nan si kinsa man, sa atong nasayran, ang orihinal nga Tag-iya? Ang Dios Mismo. “Ug miduol ang Cordero ug gikuha ang maong Basahon sa toong kamot Niadtong nagalingkod sa Trono.” Si kinsa man ang maong Cordero? Ang Manunubos, ang atong Kabanay’ng Manunubos, ang Kabanay sa Iglesia, Nga miabot ug gitubos ang Israel.

<sup>52</sup> Karon moabot ra kita dinha niining buntaga. Gitubos man ang Israel, apan wala gyud kadto naaplikar kanila, tungod kay gisalikway man nila Siya. Pero, gidawat sa Iglesia ang ilang katubsanan, ug Siya mao ang atong Kabanay’ng Manunubos. Maingon nga kinahanglang tubson ni Boaz si Noemi kaniadto, aron makuha si Ruth, ang Moabitanhon, nga usa ka dumuloong, usa ka Gentil, mao man usab nga gitubos ni Cristo ang Israel, giaplikar unta ang katubsanan, pero gisalikway man.

<sup>53</sup> Mahinumduman n’yo ba kadtong bahin sa pagpasaylo, nga para unta niadtong lalaki nga gipatay, nga akong usahay ginasugilon? Sa panahon sa gubat sibil, kaniadto. . . Siya’y usa ka maayo nga lalaki. Inosente man siya, pero sa ilang pagtan-aw siya’y sad-an. Hinoon, sad-an siya sa usa ka paagi, tungod miikyas man siya niadtong panahon sa gubat. Ug mao nga ilang nakaplagan siya nga sad-an ug nahukman siya nga patyon. Ug may usa ka lalaki nga miadto kang Presidente Lincoln ug miingon, “Mr. Lincoln, kini nga lalaki usa man ka Cristohanon. Pero nahadlok lang siya. Ang maong batan-ong lalaki, nakaila sàb ko sa iyang pamilya. Pero nahadlok lang gyud siya. Wala pud niya gituyo nga makahatag og kadaut. Miikyas lang gyud siya.” Ingon pa, “Mr. Lincoln, anaa ra kini sa imong mga kamot. Tungod ikaw ra man ang bugtong makapasaylo kaniya.”

Mikuha si Mr. Lincoln og usa ka papel ug iyang igsusulat, ug nagsulat, “Ginapasaylo na si *Ingon niini-ug-ingon niana*. Abraham Lincoln.”

Midalagan ang maong lalaki pabalik ngadto sa bilanggoan, ug ingon siya, “Ania na. Nakuha na nako ang kapasayloan para nimo.”

<sup>54</sup> Ug miingon ang gibilanggo nga lalaki, “Dili ko motan-aw niana. Aduna unta kana og dakung selyo. Makatabang gyud unta kana kung aduna lang unta. Ginahimo lang ko nimong usa ka kataw-anan. Dili man kana si Abraham Lincoln. Tungod mahimo man ni bisan kinsa ang magpirma sa iyang ngalan. Ug dokumentado pud unta kana sa iyang selyo, ug uban pa, kung sa iyaha man gani gikan kana.” Ug gikumbinsi gyud siya sa maong lalaki; bisan pa man naghunahuna ang gibilanggo nga lalaki nga

nagtiaw-tiaw ra ang usa pa ka lalaki, ug mao nga milakaw na lang.

Pagkasunod buntag, gipatay gyud ang gibilanggo nga lalaki. Ug human nga namatay na siya, aduna dayon og pagbista didto sa nasudnong hukmanan, tungod kay si Abraham Lincoln, baynte-kuwatro oras sa wala pa gipatay ang lalaki, gisulat man niya ang iyang ngalan nga kadtong lalaki gipasaylo na. Pero gipatay gihapon sa gobyerno ang maong lalaki, bisan pa man. Kung ingon-niana unsa na man? Dayon ang nasudnong hukmanan sa Estados Unidos, miingon, midangat sa niini nga desisyon ang Nasudnong hukmanan, miingon, “Ang pagpasaylo dili mamahimong usa ka pagpasaylo gawas kon dawaton una kini ingon nga kapasayloan.”

<sup>55</sup> Ug gitubos man ni Jesus ang Israel didto sa Kalbaryo. Pero wala kadto nahimong usa ka pagpasaylo ngadto kanila, tungod kay wala man nila kadto dawata ingon nga kapasayloan. Apan, sa atong leksyon karon mahitungod niining kapitoan ka semana, atong mahibaloan nga mibalik sila ug gidawat na ang ilang kapasayloan. Ug, gitubos sab Niya ang Iglesia, mao nga napasaylo kita tungod kay gidawat man nato ang Dugo ni Jesus Cristo ingon nga atong kapasayloan.

<sup>56</sup> Bueno, nahibaloan nato nga Siya mao ang atong Kabanay'ng Manunubos, ug gikuha Niya ang Basahon gikan sa kamot sa orihinal nga Tag-iya. Usa kini ka titulo sa katubsanan. Hingsayran nato kana. Mahinumduman n'yo ba ang maong pagtuon? Usa kini ka titulo sa katubsanan. Usa kini ka titulong abstract nga kalakip na dinha, ang gikinahanglan sa Dios nga kinabuhi baylo sa kamatayon, didto sa tanaman sa Eden. Dayon, si Jesus, ang Maong matarung, namatay ug gikuha ang titulo, ug arang Niyang nabadbad ang mga Selyo, gipadayag kung unsay anaa sa mga Niini; ug gihatag ang panulondon, nga panag-iya Niya, ngadto sa Iyang mga katawohan. Ang Kinabuhing Walay Katapusan, nga Iyang napanunod pinaagi sa pagbuhat niadto, nga gihatag Niya ang Kaugalingon Niyang Kinabuhi, didto sa Kalbaryo, ug gipang-apod-apod kini nganhi kanato pinaagi sa Espiritu Santo. Amen! Walay tawo (wala gayud) ang makahimo sa paghanduraw sa ingon niadto nga gugma, kung unsa gyud ang Iyang gibuhat!

<sup>57</sup> Pero si Satanas, nga nahimong nanag-iya kaniadto tungod sa pagkahulog didto sa tanaman, gigapus ug gitambog ngadto sa Linaw nga Kalayo. Natapos na ang iyang mga adlaw.

<sup>58</sup> Si Jesus, diha sa Ebanghelyo, adunay upat ka titulo. Nahisgotan na nato kana. Anak ni David, ingon nga manununod sa Trono; Anak ni Abraham, ingon nga ang harianong gasa; Anak sa tawo, ingon nga manununod sa yuta; Anak sa Dios, ingon nga manununod sa tanang mga butang. Ang harianong gasa!

<sup>59</sup> Diha sa Daang Tugon, ang katigayonan kaniadto dili mamahimong—dili mamahimong panag-iyahon kon molagpas na sa singkwenta ka tuig. Dili kadto puedeng ibalik ngadto sa orihinal nga tag-iya gawas kon molagpas na sa singkwenta ka tuig. Ug tuod man niadtong ikakuwarenta ka adlaw gibayran Niya ang bili. Sa ikasingkwenta ka adlaw, ang katubsanan ug ang gahum nga panag-iya gyud sa Iglesia, nga nawala kaniadto sa tanaman sa Eden, gitubos og balik, ug gipadala nganhi kanato pinaagi sa bautismo sa Espiritu Santo, niadtong ikasingkwenta ka adlaw.

<sup>60</sup> Bueno nahisgotan na nato kini, ang basahong-linukot. Atong gihisgotan ang mga basahong-linukot, kung unsa nga gitunol kining basahong-linukot ngadto Kaniya. Kung unsa nga si Jeremias, sa Jeremias 32:6, ang iyang ig-agaw, nga si Hanameel, nagbilin kaniya og usa ka panulondon. Ug paingon na sila kaniadto sa pagkabihag. Nga, atong pagahigsotan sàb, siya, niining buntaga: sa pagkabihag. Ug kini nga basahong-linukot nakatago sa usa ka yutan-ong sudlanan; kon diin nagapakita nga ang gahum sa Dios, ug ang mga basahong-linukot ug mga tinago sa Dios, mahipadayag ra, sa kasingkasing. Ang plano sa katubsanan para kanato, nakatago man usab sa mga yutan-ong sudlanan, ang Ngalan ni Jesus ug ang kapadayagan.

<sup>61</sup> Hingsayran nato nga selyado kini og Pito ka Selyo, ug hiniktan usab ang matag Selyo. Ug sa diha ipahayag na ang kapadayagan, gibadbad Niya ang Selyo, ug giablihan kini ug gibasa kung unsay gikasulti sa niana nga Selyo. Dayon Iyang giablihan ang usa na usab, ka basahong-linukot, ug gibasa kung unsay gikasulti diha niana nga Selyo. Ablihan ang usa na usab, gibadbad kini ug gitan-aw kung unsay gikasulti diha niana nga Selyo, ug kung unsa mismo ang kapadayagan. Eksaktong ingon niana ang Pito ka Selyo, nga atong pagahisgotan sa dili madugay, nagasalig kita, nga mahisgotan gyud nato. Ang matag Selyo, sa dihang tangtangan na kana gikan sa Basahon, pagaablihan kana, ug igapakita niana sa ingon ka eksakto kung unsa gyud ang nahitabo.

<sup>62</sup> Nahibaloan nato nga adunay “pito,” lima sa plano sa katubsanan. Lima man ang numero. Ug mao nga adunay lima ka tinag-pito: Pito ka Selyo, Pito ka Espiritu, pito ka manulonda, Pito ka Trumpeta, ug pito ka kapanahonan sa iglesia. Busa, nakita n’yo, ang lima ka tinag-pito mao ang grasya. Ang lima mao ang grasya, ug ang pito mao ang kahingpitan. Busa hingpit gayud kini nga nagakatakdo, kita n’yo. Oo.

<sup>63</sup> Ingon nga, sa matag mabadbad nga Selyo sa Pulong sa Dios, ginapadayag pud ngadto sa maong tawo sa kapanahonan, kung unsa na ang kapanahonan nga atong gikinabuhian, ang espiritu sa maong kapanahonan, og ang iglesia sa maong kapanahonan. Sa Pinadayag 10, sa katapusan, atong makita nga sa dihang gitangtang na ang kaulahiang Selyo, hingsayran nato ang

Manulonda nga nagatindog nga ginatunob ang usa ka tiil sa yuta, ug ang usa usab sa dagat, samtang ginapataas ang Iyang mga kamot ngadto sa Langit, ug may balangaw ibabaw sa Iyang ulo, og nagapanumpa Kaniya nga buhi hangtud sa kahangturan, nga tapos na ang panahon, diha sa kaulahiang Selyo. Ug hulati ninyo hangtud nga modangat na kita sa mga Selyo ug masayran ra ninyo kung asa kanang Selyo.

Human nga masayran n'yo ang kapitoan ka semana, dayon hibaloa n'yo kung unsa ang mga Selyo, "Tapos na ang panahon," tapos na ang katubsanan, og Siya na mao ang Leon ug ang Maghuhukom. Siya pa ang inyong Manluluwas niining buntaga, apan usa niana ka adlaw Siya'y mamahimo na nga inyong Maghuhukom.

<sup>64</sup> Ang ika-8 hangtud sa ika-1 . . . ika-14 nga bersekulo sa ika-5 nga kapitulo, nagapadayag kana sa panahon nga pagasimbahon ang Cordero, diha sa Langit ug sa yuta; ang Basahon nga selyado og pito-ka-selyo, ang takus nga Cordero, ang Kabanay'ng Manunubos. Ug gikan sa ika-8 nga bersekulo, hangtud sa ika-14, ginasimba Siya sa mga Anghel, ginasimba Siya sa mga anciano, ginasimba Siya sa mga buhing Binuhat. Ug gisimba gayud Siya ni Juan hangtud nga miingon kini, "Ang tanang binuhat sa Langit, sa yuta, sa ilalum sa yuta, nadungog ako nga nagaingon, 'Panalangin, himaya, gahum, kaalam, maanaa sa Cordero.'" Mao kana ang panahon sa pagsimba sa Hari nga Cordero. Pero, gisakgaw na nianang higayona ang Iglesia, timan-i n'yo.

<sup>65</sup> Karon atong ablihan sa Daniel, sa ika-9 nga kapitulo, ug sa ika-1 hangtud sa ika-3 nga bersekulo. Ug dayon atong basahon ang ika-20 hangtud sa ika-27, tungod kay mao man kini mismo ang pag-ampo ni Daniel. Gusto ko nga inyong balik-balikon og basa kini, sa tibuk semana, ha, hangtud nga masabtan n'yo kini.

*Sa nahaunang tuig ni Dario ang anak nga lalaki ni . . . sa kaliwat sa mga Medianhon, nga gihimong hari sa tibuk nga gingharian sa mga Caldeanhon;*

*Sa nahaunang tuig sa iyang pagmando ako si Daniel . . . -nakasabot, nakasabot pinaagi sa mga basahon nga ang gidaghanon sa . . . mga tuig, nga tungod niana miabot ang pulong sa Dios kang Jeremias nga manalagna, mahitungod sa pagkatuman sa pagkalumpag sa Jerusalem bisan sa tapos ang kapitoan ka tuig.*

Karon (ang sunod) akong gipaatabang ang akong nawong sa Ginoong Dios, sa pagpangita kaniya pinaagi sa pag-ampo ug mga pagpangaliyupo, ug pagpuasa, ug pagsapota sa sako, ug mga abo:

*. . . ako nag-ampo sa GINOONG . . . Dios, ug nanugid kaniya, . . .*

<sup>66</sup> Ug nagpadayon si Daniel, hangtud nga modangat kita karon sa ika-20 nga bersekulo. Aron makadaginot tà og oras, tungod nanagtindog man gud ang mga tawo, gusto kong modiritso na kamo sa 20, aron nga moabot na kita dinha sa—sa ika-20 nga bersekulo.

*Ug sa nagasulti pa ako, ug nagaampo, ug nagasugid sa akong sala ug sa sala sa akong katawohan nga Israel, ug samtang ginabubo ko pa ang akong mga pagpangaliyupo sa atubangan sa GINOO nga akong Dios tungod sa balaang bukid sa akong Dios;*

*Apan, sa nagasulti pa ako sa pag-ampo, ang tawo nga si Gabriel, nga akong hikit-an sa panan-awon sa sinugdan, misugod... sanglit gipalupad sa makusog, mihikap kanako sa panahon nga haduol na ang panahon sa paghalad sa kahaponon.*

*Ug ako gipasabot niya, ug nakigsulti kanako, ug miingon, Oh Daniel, ako mianhi karon sa paghatag kanimo sa kaalam ug pagsabot.*

<sup>67</sup> Unsa na kaha kung atua kita didto! Sa unsa mang paagi nga Iyang nakaplagan siya? Sa pag-ampo.

Ang Anghel, “ang maong tawo.” Kon namatikdan ninyo, gitawag niya Siya, “ang tawo.” Ug ingon nga...

*Ug sa sinugdan sa akong mga pagpangaliyupo gipagula ang sugo, (ug gipagula kadto aron siya moadto), ug ako mianhi aron ipakita kanimo; kay ikaw ginahigugma gayud: kung... busa palandunga ang pulong, ug sabta ang panan-awon.*

*Kapitoan ka semana mao’y tagal ibabaw sa imong katawohan ug sa imong balaang siyudad, o sa imong siyudad, sa paghuman sa kalapasan, ... sa pagtapos sa sala, ug sa paghimo sa pagpasig-uli alang sa kasal-anan, ug sa pagpasulod sa walay-katapusang pagkamatarung, ug sa pagmatuod sa panan-awon ug sa panagna, ug sa pagdihog sa labing Balaan.*

Mao kana ang unom-ka-pilo nga hinungdan sa Iyang pag-abot. Karon matikdi.

*Karon, busa, busa hibalo i ug sabta, (karon paminaw mo) nga sa paggula sa sugo sa pagpahauli ug sa pagtukod sa Jerusalem alang sa... Mesias ang Principe mapito ka semana, ... kan-uman ug duha ka semana: ug tukoron kini pag-usab uban ang dalan, ug ang mga kuta, bisan sa masamok nga panahon.*

*...sa tapos ang kan-uman ug duha ka semana ang Mesias pagapatyon, ug siya walay bisan unsa: ug ang katawohan sa laing principe nga moanha—sa principe nga moanha... mao’y moguba sa siyudad ug sa balaang*

*puloy-anan; ug ang katapusan niana mahiuban sa baha, . . . hangtud sa katapusan may gubat ang mga pagkalumpag gitagal nga daan.*

*Ug siya magapamatuod sa lig-on nga tugon (paminaw) uban sa daghan sulod sa usa ka semana, usa sa niining kapitoan ka semana: ug sa tunga-tunga sa semana iyang pahunongon ang paghalad ug . . . halad-nga-kalan-on, ug ibabaw sa pako sa dulumtanan moanhi ang magalumpag, ug bisan hangtud sa pagtibawas, ug kana sanglit natagal na ang kaligutgot igabubo sa ibabaw sa linumpag.*

<sup>68</sup> Karon, mao kana ang atong leksyon para sa sunod nga tulo, upat, lima ka panagtigum, o kung unsa ma'y ipadayag sa Ginoo. "Kapitoan ka semana."

<sup>69</sup> Bueno, hangyoon sa nako si Doc, kung mahimo, unyang gabii, nga iplatar niya ang akong pisara dinha, aron maihulagway ko kini. Dili ko gustong masayloan ninyo kini. Mao nga kinahanglan sa b ninyong magtuon uban kanako, ug magtuon gyud sa halawum, kay kon dili masayloan gyud ninyo kini. Ug gusto kong ihulagway kini dinhi sa pisara, ug busa dalha ninyo ang inyong mga lapis ug papel ug isulat kining mga petsa, kini nga mga panahon, ug tanan na mahitungod niini.

<sup>70</sup> Bueno, ang kapitoan ka semana magasugod (karon sabta n'yo kini) human nga gilalin na ang Iglesia. Karon, ang tanan nga nakasabot niana, moingon, "Amen." [Nagaingon ang kongregasyon, "Amen."—Ed.] Bueno, human nga gilalin na ang Iglesia.

<sup>71</sup> Pinadayag 6:1, hangtud sa Pinadayag 19:21, may kahilambigitan kana sa kapitoan ka semana, busa mohunong sa kita ug mohatag og katin-awan, adisir kita magpadayon. Kinahanglan mohunong sa kita ug hatagan og katin-awan ang katuyoan niining kapitoan ka semana. Kay, kung dili, nan masayloan gyud ninyo ang mahitungod sa mga Selyo, masayloan ninyo ang mga Trumpeta, masayloan ninyo ang mga Panaksan, ang mga Hampak, ang tulo ka mahugaw nga mga espiritu nga mora og mga baki, ang tulo ka mga Kagul-anan, ang pagtambog sa mapula nga dragon, og ang babaye nga nagbisti'g adlaw. Masayloan ninyo kana tanan, kung dili kana mahatagan og katin-awan, tungod kay nagakahitabo kana mismo dinhi sa niining ika-setenta ka semana. Dinha kana mahitabo.

<sup>72</sup> Bueno, ang propetang si Daniel atua siya kaniadto sa Babilonia sulod sa saisenta'y-otso na ka tuig. Kamong mga gustong tan-awon ang mga ginapahinungod niini, ug para makadaginot kamo og oras, ako na lang ang—ang motan-aw niini. Saisenta'y-otso ka tuig! Gibihag siya niadtong B.C. 606, ug miabot kaniya ang panan-awon niadtong—niadtong B.C. 538. Ang 538 kung i-maynus sa 606, adunay saisenta'y-otso. Mao nga

saisenta'y-otso ka tuig siya nga atua sa Babilonia, sa taliwala sa mga pagano, ug sa gihapon nagkaaduna siya og kadaugan. Amen. Pero kita basin dili gani makalahutay bisan usa ra ka oras.

<sup>73</sup> Apan dugay siyang naatua sa ilang taliwala, nga walay si kinsa man gawas sa tulo ka kauban, pero atua sila sa nagkalainlaing bahin sa gingharian. Apan, si Daniel, nga nag-inusarang mibarug sa Dios, nakuptan gihapon ang kadaugan sulod sa saisenta'y-otso ka tuig. Palundunga n'yo kini! Dili ko unta gustong magsugod og wali, tungod kay usa man unta kini ka Mensaheng pagpanudlo. Apan, saisenta'y-otso ka tuig, nga napapabilin niya ang kadaugan ug walay-buling, sa atubangan sa Dios; nga wala pa kaniadto ang bautismo sa Espiritu Santo, wala pa ang Dugo ni Jesus Cristo aron makapangaliya para kaniya; kondili aduna lamang og dugo sa mga toro, ug mga kanding, ug mga dumalaga nga baka, nga kinahanglan pa niyang ihalad sa tago kaniadto, tungod sa mga paganong tradisyon niadtong nasura. Gidala man sila didto. Ngani gipropesiya na man ni Jeremias ang mahitungod kanila, nga mamaatua sila didto.

<sup>74</sup> Busa, si Daniel, oh, grabe, hinay-hinay niyang nasabtan nga ang panahon nagakahiduol na, sama lang kanato sa karong panahon. Si Daniel hinay-hinay nga “nakasabot,” ingon siya, “pinaagi sa pagbasa sa mga basahon.”

*Ug sa nahaunang tuig sa pagmando ni . . . si Daniel . . . sa pagmando ako si Daniel nakasabot pinaagi sa mga basahon nga ang gidaghanon sa . . . mga tuig, busa . . . miabot ang pulong sa GINOO kang Jeremias nga manalagna, nga kinahanglan mamatuman sa kapitoan ka tuig sa . . . pagkalumpag sa Jerusalem.*

<sup>75</sup> Si Jeremias, niadtong B.C. 606, nagpropesiya, tungod sa ilang mga sala ug pagkadili-diosnon, setenta ka tuig nga mamaatua sila didto.

<sup>76</sup> Hinumdumi n'yo, nga adunay usa pa ka propeta nga mitungha niadtong panahona. Dili ko lang madumduman ang iyang ngalan niining orasa. Tingali'g ako rang madumduman sa—sa pipila ka minuto, kung hunahunaon gyud nako sa makadiyut. Tuod man mitungha siya ug miingon, “Jeremias, sayup ka. Pipila lang man ka adlaw nga ipapabilin sa Dios ang Israel didto, pipila lamang, basin mga duha ka tuig ra.”

<sup>77</sup> Miingon si Jeremias, “Hinaut unta. Amen.” Ingon pa siya, “Pero kadali lang. Ikaw ug ako susihon sa natong duha, ingon nga mga propeta.” Ingon siya, “Hinumdumi, nga adunay mga nagpropesiya kaniadto nga nauna na kanato, ug nanagsulti sila og mga butang nga sayup. Ug gisilotan sila sa Dios tungod sa pagsulti og mga butang nga sayup. Busa, siguradohon gyud nato.

Apan nagsulti man kanako ang Ginoong Dios nga aduna pa'y setenta ka tuig."

Gihampak sa Dios ang maong mini nga propeta, ug gikuha gyud ang iyang kinabuhi niadtong mao ra mismo nga tuig, tungod kay gisultihan na man sa Dios kining tinuod nga propeta nga adunay setenta ka tuig.

<sup>78</sup> Ug gusto ko nga inyong matikdan kung unsa nga si Daniel, bisan pa usa siya ka langyaw, bisan pa nga gihimulag siya gikan sa iyang mga kabanay, gipalayas gikan sa iyang iglesia, og walay ni usa ka buluhaton sa simbahan, walay unsa mang simbahan nga matambongan, walay mga himno nga mahimong awiton gawas lang sa iya mismong ginaawit, taliwala sa tanan niadto, sa gihapon nanghawid gayud siya sa gisulti niadtong propeta. Amen! Amen!

<sup>79</sup> Walay simbahan nga matambongan, walay si kinsa man nga maka-fellowship; tungod ang tanan nangadto na man sa paganong mga templo, ang tanan nanagsimba na sa ilang mga dios-dios. Walay mga alawitong pang-Cristohanon; walay si kinsa man nga mitoo sa mismong butang nga iyang gitooan. Ug sulod sa saisenta'y-otso ka tuig, gikan pa sa pagkabatan-on nga mga dose anyos, katorse anyos ang pangidaron, kaniadtong gidala siya didto, nagpabilin gyud siya nga matinud-anon sa Dios; ug nakasabot pinaagi sa propesiya ni Jeremias nga ang mga adlaw hapit na nga matapos.

Daw sa unsa nga mapasidan-an gayud niana ang kasingkasing sa kinsa mang tinuod nga propeta sa Dios sa karong panahon, ang mabalikan ug matan-aw nato kung unsa ang gisulti niining tinuod nga propeta, ug masayran nga ania na kita sa katapusang panahon.

<sup>80</sup> Ingon si Daniel, "Ako nakasabot pinaagi sa mga basahon nga si Jeremias, nga akong igsoon, daghan, daghan nang mga tuig ang milabay, nagpropesiya nga magpabilin ang Israel dinhi sa setenta ka tuig. Ug kanang panahona hapit nang matuman." Ug mao nga giandam niya ang iyang kaugalingon. Ug nagpahigayon siya og pagpuasa, ug gipabalaan ang iyang kaugalingon, ug sa dihang . . . mga abo ug sapot nga sako, ug gibutang kadto sa iyang ulo, ug nagpuasa ug nag-ampo, aron mahibaloan kung unsa na nga adlaw ang ilang gikapuy-an.

<sup>81</sup> Ug kung si Daniel, nga propeta sa Ginoong, mikonsulta sa mga basahon ni Jeremias, ug gidala siya sa ingon niadto nga punto; nga bisan pagawas na ang Israel, nga silang tanan buhi, pagawas na gikan sa Babilonia, aron mamalik na sa ilang yutang-natawhan, naghinungdan kaniya nga magpuasa og magbisti og sapot nga sako ug mga abo. Unsa pa kaha ang mahimong buhaton niini ngadto sa Iglesia sa buhi nga Dios, kon masayran nga ang panahon nagakunhod na ug patapos na; ug ang Pag-abot ni Ginoong Jesus Cristo, ug ang mahimayaang Milenyum

andam nang mahitabo! Nganong mag-usik-usik pa man tà og panahon, sa pagsugal-sugal, pag-adto sa mga kaligoanan inig ka Domingo, og wala na'y panahon para sa Ginoo? Nagabagdoy-bagdoy lang. . . Ngani kung ang pastor maghisgot na bahin sa usa ka butang nga dili ninyo maangayan, motindog dayon mo ug mogawas. Ug kung ang—kung madugay gani ang panimbahon, aba, kamo—kamo, kamo'y—mapul-an na dayon kamo. Tan-awa n'yo ang atong kahimtang. Tan-awa n'yo ang atong ginapangbuhat.

Ikumpara unta nato ang atong mga kinabuhi sa maong propeta. Usa ra ka tawo, nga anaa sa usa ka tibuok gingharian, nga walay simbahan nga matambongan, ug walay maadtoan bisan asa man. Tungod giguba ug gisunog man kadto; ang iyang siyudad, gipangbihag pud ang iyang mga kabanay. Saisenta'y-otso ka tuig! Saisenta'y-otso, saisenta'y-nuebe, setenta; aduna na lang siya'y duha ka tuig. Busa sa pagbasa niya sa basahon ug nasabtan nga ang panahon haduol na nga matapos, matuman, miduol siya sa Dios pinaagi sa pag-ampo, aron hibaloan ang mahitungod niadto.

<sup>82</sup> Pagkakuyaw nga panahon! Pero unsa ba'y ginahimo nato? Sa diha nga, “Ang mga nasud nanagkabulag; ang dagat nagadaguok; ang kasingkasing sa mga tawo nangaluya na tungod sa kahadlok; panagkalibog sa panahon.” Tanan na niining mga butanga, ang sinulat-sa-kamot diha sa bungbong. Panaglailain sa mga kaliwatan; tanan na nga matang sa kadautan nga nagakahitabo sa kalibutan; ug mga panagbingkil, ug mga panag-away, ug mga panaglantugi. Ug ang mga hinagiban anaa na nakaandam sa mga silonganan sa eroplano, nga ang usa ka gamay'ng nasud nga ingon ra ka gamay sa Cuba mahimo niining puohon ang kalibutan sulod sa diyes minutos. Ug nagalalisay sila sa usa'g usa, mga tawong dili-diosnon nga wala makaila sa Dios ug wala masayod sa Iyang gahum.

Ug samtang ang Balaang Espiritu sulod sa Iglesia, nagapanglihok pud sa taliwala sa mga Pinili, ginapakita ang Iyang Kaugalingon nga buhi sa gihapon human sa duha ka libo ka tuig, nga Siya mao sa gihapon kagahapon, karon, ug hangtud sa kahangturán. Pero nganong nagalingkod-lingkod lang kita nga daw sa mga tapolan? Nganong ginapalagpas lang man nato kini? Panahon na para mangsusi kita, og magmaigmat alang nianang mahimayaong takna nga nagsingabot na.

<sup>83</sup> Karon, nabasa niya diha sa Jeremias, sa ika-25 nga kapitulo. Ablihan nato sa Jeremias, sa ika-25 nga kapitulo, ug basahon tà kung unsay gisulti ni Jeremias. Bueno, sugdan diay nato sa ika-8 nga bersekulo, tungod nga kini'y. . . gusto kong makasigurado nga makuha ninyo kini. Ang ika-11 nga bersekulo man gud ang akong naisulat dinhi nga basahon, pero sugdan na lang nato sa ika-8 nga bersekulo.

*Busa mao kini ang giingon sa GINOO sa mga panon; . . .*

Gusto ko gayud kana. Pag madungog ko ang usa ka propeta nga motindog nga dunay MAO KINI ANG GINAINGON SA GINOO, igsoon, mao na kana. Para nako, mao na kana. Mao lang gyud kana.

*. . . mao kini ang giingon sa GINOO sa mga panon; Tungod kay kamo wala managpatalinghug sa akong mga pulong,*

*Ania karon, ipadala ug ipakuha ko ang tanang mga banay sa amihanan, nagaingon ang GINOO, ug ipadala ko si Nabucodonosor nga hari sa Babilonia, akong alagad, ug dad-on ko sila pag-usab. . . batok niining yutaa, ug batok sa mga pumoluyo niini, ug batok niining tanan nga mga nasud nga nanaglibot, ug pagalaglagon ko gayud sila, . . .*

Timan-i n'yo, nga sila nga mga pinili sa Dios ang Iyang ginahisgotan dinhi. Dili ang mga ateista. Kondili ang mga miyembro mismo sa iglesia.

*Labut pa kuhaon ko gikan kanila ang tingog sa kasadya, . . . ang tingog sa kalipay, (sama lang sa atoa karong panahona, nga puro rock-and-roll, Ricky ug Elvis,) ug, oh, ang tingog sa kaslonon nga lalaki, . . . ang tingog sa langgam. . . o, sa kaslonon nga babaye, diay, ang dinaguok sa galingan, . . . ang kahayag sa lamparahan.*

*Ug kining tibuok nga yuta mahimong biniyaan, . . .*

Paminawa n'yo ang maong propeta nga nagasinggit, “Kining tibuok nga yuta mahimong biniyaan!” Ug dili ingon nga ginaawat-awat ko kining halangdon nga alagad sa Dios, apan ginapropesiya ko nga kining tibuok nga nasud mamahimong biniyaan usab. Pagasilotan sa Dios kining nasura tungod sa mga sala niini. Kung wala man gani tugoti sa Dios nga makalusot ang Israel, nga Iyang pinili, Binhi ni Abraham, nga Iyang gihimoan og pakigsaad ug gisaaran, kung wala Niya tugoti nga makalusot sila sa ilang paghimo’g-dautan; bisan pa sila’y mga relihiyoso gayud sa kinasuloran, aduna og bantugang mga kasimbahanan, ug mga sacerdote, ug mga rabbi; apan tungod sa mga pagka-imoral ug mga ingon-anang butang sa taliwala nila, gipaani gyud sa Dios kanila kung unsa ang ilang gipangpugas, mao man usab kita nga mahiagum usab niini. Ika-11 nga bersekulo:

*. . . kining tibuok nga yuta mahimong biniyaan, ug . . . makapahibulong; . . .*

Sa ato pa, tan-awon sila sa tanan ug moingon, “Tan-awa sila. Bantugan baya kaayo sila kaniadto. Pero tan-awa n'yo sila karon.”

*...ug kining mga nasura manag-alagad sa hari sa Babilonia sulod sa kapitoan ka tuig.*

Pang-tibuok nga kinabuhi na kana. Panahon kana nga ang imong tigulang, bulahang tigulang inahan usa pa ka masuso kaniadto. Tuod man atua sila didto nga walay Dios, walay ni usa ka simbahan, walay ni usa ka awit, wala gyu'y bisan unsa, sulod sa tibuok henerasyon, hangtud nga nangamatay na lang ang tanan-tanan sa niadtong makasasala nga kaliwatan.

*Ug mahanabo sa matuman na, ang kapitoan ka tuig, nga pagasilotan ko ang hari sa Babilonia, ug kanang nasura, nagingon ang GINO, tungod sa ilang kasalanan, ug ang yuta sa mga Caldeahanon, ug himoon ko kini nga biniyaan sa walay katapusan.*

*Ug dad-on ko diha nianang yutaa ang akong mga pulong nga akong gipamulong batok niana, bisan kadtong tanan nga nahasulat niining basahona, nga gipropesiya ni Jeremias batok sa tanang mga nasud.*

*Kay daghang mga nasud ug dagkung mga hari nga magaulipon kanila—kanila bisan pa kanila: ug panimaslan ko...sumala sa ilang mga buhat, ug sumala sa ilang mga pulong sa ilang mga kamot.*

*Kay mao kini ang giingon sa GINOONG Dios sa Israel kanako; Kuhaa kining copa sa vino sa kaligutgot gikan sa akong kamot, ug ang tanang mga nasud, nga paadtoan ko kanimo, paimna niini.*

Sa laing pagkasulti, “Jeremias, gihatag Ko kanimo kini nga mensahe. Ayaw pagpabilin nga nagalingkod-lingkod lang. Ayaw pagpabilin sa usa ra ka lugar, kondili magpropesiya ka sa tanang mga nasud.” Ginasundan n’yo ba kini? “Magpropesiya ka sa tanang mga nasud. Ipasundayag mo ang Akong mga ilhanan ug mga katingalahan, ug ipahibalo kanila nga moabot Ako aron buhaton kini.”

*Ug sila manginom, ug managsamparay ngadto nganhi, ug mangabuang, tungod sa pulong nga akong ipadala sa taliwala nila.*

<sup>84</sup> Unsa ba’y ginahimo sa mga tawo sa karon mismong panahon? Tawgon ka nila nga usa—usa ka mini nga propeta, tawgon ka nga usa—usa ka tigkompromiso, tawgon ka nga usa—usa ka panatiko, usa ka magtatagna nga bakakon, o usa ka magdadamgo og mga damgo, o usa ka matang sa mental telepathist. “Sila’y mangabuang!” Ug ang pulong nga *buang*, kung imo kining isaysay og ayo, nagakahulogan og “wala-sa-hustong-pangisip.” “Sila gayu’y mangawad-an-sa-hustong-pangisip, ug moingon, ‘Ah, ayaw n’yo paminawa kanang holy-roller, kanang walay-kapuslanan,’ tungod sa Pulong nga Akong ipadala sa taliwala nila.”

<sup>85</sup> Nakita n'yo na ang kasaysayan nga nagakahitabo pag-usab? Wala miuyon si Jeremias sa ilang mga Fariseo, mga Saduceo, mga Herodian, o kung unsa man sila kaniadto. Siya, iya lamang gipahayag ang Pulong, ug tungod Niadto nangasuko silang tanan kaniya. Unsa man? Karon matikdi n'yo.

*Ug unya gikuha ko ang copa nga gikan sa kamot sa  
GINOO, ug gipainom ko ang tanang mga nasud niini, . . .*

Si Jeremias wala gyud nagpabilin lang sa balay. Si Jeremias wala ingon nga nagpabilin lang sa usa ka gamay'ng dapit, kondili iya gayud nga gipainom niini ang tanang mga nasud.

*. . . nga gipaadtoan kanako sa GINOO:*

<sup>86</sup> Gidala ni Jeremias ang Pulong sa Ginoo, ang bino sa Iyang Pulong. Ug ang bino mao ang gahum sa Iyang Pulong. Adunay gahum ang bino. Ang bino usab usa ka makahubog. Adunay gahum ang bino. “Ug gidala ko ang Pulong sa Ginoo,” ang ingon ni Jeremias, “ug gipadayag Kini. Ang bino, ang gahum nga anaa Niini, akong gipasundayag sa atubangan nila, ug ayaw nilang mamati Niini.”

Miingon ang Dios, “Kung ingon niana ipadala Ko sila sa Babilonia sulod sa setenta ka tuig.” Mao kana mismo ang Iyang gibuhat. Ang mga matarung ug mga dili-matarung parehong, napaingon didto.

<sup>87</sup> Bueno, balik tà sa maong leksyon. Dugay nang nagabasa si Daniel. Hunahunaa lang ninyo, ginabasa ni Daniel kaniadto ang mao ra mismong mga Pulong nga atong ginabasa niining buntaga. Mao ra nga Biblia ang ginabasa ni Daniel kaniadto, mao ra nga mga panulbok, mao ra usab nga mga han-ay sa mga pulong, mao ra mismo nga mga butang nga, pinaagi sa tabang sa Dios, akong pagabasahon kaninyo sa mosunod nga mga pila ka Mensahe, mao ra gayud, aron ipakita kaninyo nga ania na kita sa katapusang panahon.

Ug si Daniel, ingon nga ginadala ang Pulong gikan kang Jeremias, nahiadto sa Babilonia. Ug siya'y dinihogan nga propeta. Ug namuhat siya og mga milagro, ilhanan, makahubad og dili-mailhan nga mga pinulongan, ug namuhat og mga ilhanan ug mga katingalahan sa taliwala nila. Apan bisan pa niana, nag-inusara gyud nga mibarug, siya ra mismo! Amen! Nag-inusara siyang mibarug.

<sup>88</sup> Pero gisulat na ni Jeremias kini nga mga Pulong daghan, daghan nang mga tuig ang milabay. Ug si Daniel, sa paghubad sa Pulong, nakasabot. . . “Aba, karon kadali lang. Haduol na kami sa katapusang panahon, tungod kay saisenta'y-otso ka tuig na man ko dinhi. Ug ang propeta sa Ginoo,” amen, “ang akong igsoon, ang tinuod nga propeta sa Dios nga gipamatud-an ang iyang kaugalingon ingon nga usa ka propeta, nagpropesiya man kanamo. Naisulat ko gani kini dinhi sa usa ka basahon, nga nag-ingon, ‘Mamatuman ang setenta ka tuig.’ Oh Ginoong

Dios, haduol na gayud kami sa katapusan. Ngani nangamatay na kadtong tibuok nga henerasyon. Unsa ma'y pagabuhaton Mo karon, Ginoo? Nagsaad Ka nga magpadala kanamo. . .” Ug gihan-ay niya ang iyang kaugalingon, para mag-ampo.

<sup>89</sup> Oh Dios, kung aduna ma'y panahon nga angay namong ihan-ay ang among kaugalingon, para mag-ampo, karon na mismo. Kay, kita ingon nga Iyang tinuod nga alagad, makita nato, pinaagi sa mga Sulat sa apostoles, pinaagi sa mga pagpasidaan sa Balaang Espiritu, nga ania na kita sa kaulahiang adlaw. Ngani nagasulti ang Balaang Espiritu, “Nga sa kaulahiang mga adlaw, ang mga tawo mamahimong gahi'g-ulo, hambugiro, mahigugmaon sa mga kalingawan labi pa kay sa Dios, dili-malukmay, tigbutang-butang, dili-mapugnganon, ug dili-mahigugmaon sa maayo.” Nasabtan ko gayud pinaagi sa maong Sulat.

<sup>90</sup> Ug nasabtan ko nga mangabot ang mga mayubiton, sa kaulahiang adlaw. Nasabtan ko nga magkaaduna og nasud nga mobatok sa nasud, sa kaulahiang adlaw. Nasabtan ko usab nga magkaaduna og dagku kaayo nga mga balud, sa kaulahiang adlaw. Nasabtan ko nga magkaaduna og makahahadlok nga mga talan-awon, sama sa mga flying saucer, diha sa kawanangan, misteryoso nga mga talan-awon, ug ang kasingkasing sa mga tawo mangaluya tungod sa kahadlok. Magkaaduna sàb og panagkalibog sa panahon, ug kagulan-anan taliwala sa mga tawo. Nabasa pud nako nga mopaingon silang tanan sa mga organisasyon ug mga denominasyon, ug magkaaduna og usa ka konpederasyon, sa kaulahiang adlaw. Nasabtan ko nga pagaputlan sa mga kababayen-an ang ilang buhok sa kaulahiang adlaw. Nasabtan ko nga managsul-ob sila og mughong mga bisti, ug magalakaw nga nakasul-ob og mga sapatos nga habog og takong, nga nagataguktok samtang sila nagalakaw, sa kaulahiang adlaw. Nasabtan ko nga ang moralidad mamahimong ubos na kaayo sa kaulahiang adlaw. Nasabtan ko nga ang mga magwawali mamahimo nang mini nga mga magbalantay sa kaulahiang adlaw, nga mopakigkompromiso na lang, ug dili na pakan-on og Pulong sa Dios ang mga tawo, kondili managsunod hinoon sa mga kredo ug mga ingon-anang butang, ingon nga pangpuli. Apan nasabtan ko nga magkaadunay usa ka Tingog nga moabot sa kaulahiang mga adlaw, nga magasinggit gikan sa kamingawan, magatawag sa mga tawo pabalik sa orihinal nga Mensahe, pabalik ngadto sa mga butang nga iya sa Dios. Nasabtan ko, pinaagi sa Basahon, nga mahitabo kining mga butanga.

<sup>91</sup> Nasabtan ko nga sa kaulahiang mga adlaw adunay moabot nga kagutom. Ang mga kaiglesiahan mamahimong organisado na kaayo, ug ingon na ka establisado ug tanan na, nga sa kaulahiang mga adlaw adunay moabot nga kagutom, ug dili lamang sa tinapay ug tubig, kondili sa pagpatalinghug sa tinuod

nga Pulong sa Dios. Ug ang mga tawo magagikan sa sidlakan, sa kasadpan, sa amihanan, ug sa habagatan, sa pagpaninguha nga makapatalinghug sa tinuod nga Pulong sa Dios. Apan ang mga kaiglesiahan mamahimong organisado na gyud ug estrikto na kaayo, nga mapakyas na ang mga tawo sa pagpatalinghug Niini. Nasabtan ko kini pinaagi sa mga Basahon. Apan, nianang adlaw, Oh Dios, aduna ma'y mosalingsing nga usa ka Sanga gikan kang David.

<sup>92</sup> Nasabtan ko usab nga ipadala Niya si Elias sa dili pa moabot kanang adlaw sa katapusang panahon, ug magkaaduna siya og usa ka Mensahe nga magapabalik sa kasingkasing sa mga anak ngadto sa mga amahan, ipabalik sila sa orihinal, ipahibalik hangtud sa katapusan, ug magsugod usab. Nasabtan ko nga mahitabo kana sa dili pa biyaan sa Espiritu ang iglesiang Gentil, aron mobalik na ngadto sa mga Judio.

<sup>93</sup> Ug nakasabot ako dili lamang pinaagi sa Sulat. Nakasabot ako tungod mismo sa Pulong, pinaagi sa sinulat nga Pulong, nga ang Israel magabalik sa iyang yutang-natawhan; ug ngani nakita ko siya nga nagasulod na.

<sup>94</sup> Nasabtan ko pinaagi sa mga Sulat, sa mga propeta, nga ang Israel mamahimong usa na ka nasud. Ilang ibalik ang pagsimba sulod sa templo. Ang Dios makighilambigit na pag-usab kaniya pagmobalik na siya sa iyang yutang-natawhan. Oh! Motungha usab ang duha ka propeta sa kaulahiang mga adlaw, uban kanila. Nasabtan ko kana. Sa higayon mismo nga sakgawon na ang Iglesiang Gentil, moabot pud ang duha ka propeta, si Elias ug si Moises, ngadto sa Israel. Mahisgotan ra nato kana sa atong pagpadayon.

<sup>95</sup> Nakita gyud sa propetang si Daniel ang panahon nga hapit nang matapos didto sa Babilonia kaniadto. Oo.

<sup>96</sup> Dayon nagpakita si Gabriel, dili lamang aron ipadayag kung unsa ang iyang ginahangyo, kondili aron isulti sab kaniya ang tibuk panahon nga gitagal para sa kaliwatan sa mga Judio, hangtud sa pagtibawas. Amen! Diyutay lang nga bahin ang iyang gihangyo, pero nadawat niya ang kinatibuk-an niini. Mihangyo ra man unta siya aron masayran. . .

<sup>97</sup> Ginatinguha ni Daniel nga mahibaloan kaniadto, "Unsa pa man ka dugay, Ginoo, karon na ba kaha? Si Jeremias nga propeta, ang Imong alagad, ang akong igsoon, nagpropesiya man saisenta'y-otso ka tuig na ang milabay, ug miingon, 'setenta ka tuig nga kining katawhan magapabilin dinhi.' Ngani ang tibuk karaang kaliwatan halos mingtaliwan na man."

<sup>98</sup> Adunay usa ka pentecostal nga henerasyon kaniadto nga mitungha, kuwarenta ka tuig na ang milabay. "Mga karaang manggugubat," ang tawag sa ilaha. Nag-organisa sila, ug, nanag-away, ug naglantugiyay, hangtud ngadto sa Bukid sa Horeb ug Nebo, hangtud didto. Apan, sa katapusan, ania na kita

sa suba karon. Magpatungha Siya og usa ka bag-o, nga usa ka Josue nga mao'y mopatabok kanila. Napakyas ang kasugoan; kauban niini si Moises; pero napakyas si Moises. Mao nga si Josue na mao'y nagpatabok kanila. Hingsayran nato nga nangapakyas sàb ang mga organisasyon, apan ang Espiritu sa Dios... si Josue, ang pulong nga *Josue*, nagakahulogan og “si Jesus ang atong Manluluwas.” Ingon nga, ang Balaang Espiritu mosulod sa Iglesia. Dili nga usa ka organisasyon, kondili ang Balaang Espiritu mismo ang moabot sa taliwala sa mga tawo ug iandam Siya para sa paglalin, para sa pagtabok sa Jordan. Nasabtan ko pinaagi sa pagbasa sa Basahon nga mao gyud kana ang mahitabo. Ug nasayod ang Dios nga mao kana ang ginatinguha ko karon, aron nga mapahupay ko ang Iyang katawohan ug sultihan sila kung unsa ang nagsingabot na, kining mga ania dinhi karong buntaga, ug dinha sa mga nasud diin magakadangat kini nga mga teyp, sa tibuok kalibutan, nga ania na kita sa katapusang panahon.

<sup>99</sup> Gipadayag Niya ang tanan hangtud sa bug-os nga ipasig-uli ang Ginharian ug magsugod na ang Milenyum. Mao kini ang mensahe ni Gabriel. Siya miingon, “Mianhi Ako aron sultihan ka nga aduna, pa'y kapitoan ka tuig, kapitoan ka semana, nga gitagal sa imong katawohan, nga gitagal hangtud sa katapusan sa kaliwatan sa mga Judio. Adunay kapitoan ka semana.” Karon matikdi n'yo kung unsay Iyang giingon. Nga karon, gikan sa pagproklamar para ibalik...

*Kapitoan ka semana mao'y tagal sa imong katawohan  
ug sa imong...siyudad,...*

“Sa imong siyudad.” Ang Babilonia dili man niya siyudad. Kinsa...Asa ba ang iyang siyudad? Jerusalem.

<sup>100</sup> Karon, kon modangat na kita sa—sa pito, o sa unom-ka-pilo nga kapanghimatuoran, atong mahibaloan kung unsa gyud kana nga siyudad, ug isaysay og ayo ug pamatud-an kung kinsa, kinsa ang nagtukod niana, og kung asa kana gikan. Unsa ba ka dugay kana nga magalungtad? Pagatukoron ba kana pag-usab? Sa unsa man nga panahon? Oh, dagkung mga butang ang gikatagana para kanato. Oo.

*Kapitoan ka semana mao'y tagal sa imong katawohan  
ug sa imong...siyudad, sa paghuman sa kalapasan,...*

Bueno, wala Siya miingon, “Daniel...” Walay pagduhaduha nga gisulti Niya kaniya nga ang kapitoan ka semana mao'y... ang buut kong ipasabot, nga ang setenta ka tuig hapit nang matapos. Saisenta'y-otso na, duha na lang ka tuig ang nahibilin. Ug hingsayran nato nga ang propesiya ni Jeremias eksaktong mitakdo gayud. Tungod nga human sa duha ka tuig, nanggawas na man sila. Miadto si Nehemias ug nakakuha og sugo gikan sa hari, ug gitukod ang kuta niadtong masamok nga panahon.

Nagtrabaho sila. Ingon Siya, “Ang kuta...” Paminawa n’yo kini.

...sa paghuman sa kalapasan,...sa pagtapos sa sala,...

“Aron sa pagtapos sa sala.” Kang kinsa? Sa mga Judio. “Gitagal sa imong katawohan,” dili sa mga Gentil. “Sa imong katawohan,” ang mga Judio. “Ug sa imong siyudad,” dili New York, dili Boston, Philadelphia, Chicago, Los Angeles, ni Roma. Kondili, “Sa imong siyudad,” Jerusalem.

...ug sa paghuman sa kalapasan,...pagtapos sa sala,...magahimo og mga pagpasig-uli alang sa kasal-anan, ug sa pagpasulod sa walay-katapusang pagkamatarung, ug sa pagmatuod sa panan-awon ug propesiya, ug sa pagdihog sa labing Balaan. (Matikdi!)

Busa hibaloí ug sabta, nga sa paggula sa sugo sa pagpahauli ug sa pagtukod pag-usab sa Jerusalem (nga iyang siyudad) alang sa...Mesias ang Principe mapito (sa setenta) ka semana...

<sup>101</sup> Hulati ninyo hangtud nga modangat kita niana! Oh, pagkanindot! Panalangin kana nga akong...Basin mokuha na lang ko og pisi ug ihikot ang akong kaugalingon sa niini nga bahin.

<sup>102</sup> Gipadayag tanan hangtud sa katapusan, miingon, “Dili ko lamang isulti kanimo karon nga kanang duha ka tuig hapit nang, matapos kana, og matuman.” Ug nasayod na man tà nga eksaktong setenta ka tuig sila nga nagpabilin didto, ug—ug nanggawas, nga ingon ka eksakto kung unsay gikaingon mismo sa propeta. Ug si Isaias, o ang buut kong ipasabot...si Daniel mitoo gayud sa maong propeta, busa atua siya, nga andam na. Oo. Ug siya...

<sup>103</sup> Ug bueno, sa pag-adto ni Gabriel, ingon Siya, “Mianhi Ako aron ipakita kanimo ang tanan hangtud sa katapusan, og aron ipadayag kanimo kining mga butanga, nga, hangtud na sa pagtibawas.” Kita n’yo? Ania.

...sa dulumtanan moanhi ang magalumpag, bisan hangtud sa pagtibawas,...

<sup>104</sup> Ang pagtibawas mao “ang katapusan sa tanang mga butang.” “Ipakita Ko kanimo kung unsay mahitabo.” Karon paminaw. Sabta n’yo kini! “Ako...Daniel, gipadala Ako. Pinalangga ka sa Langit. Ug nadungog Ko ang imong mga pag-ampo ug minaug Ako karon aron isulti kanimo kung unsa ka dugay nga panahon ang gitagal para sa mga Judio ug sa Jerusalem, gikan karon hangtud sa pagtibawas, ang tibuok butang.”

<sup>105</sup> Karon, nasabtan n’yo ba, mga magtutuoan? Kung masayran man gud nato kung unsa kining kapitoan ka semana, nan

mahibaloan pud nato kung kanus-a ang pagtibawas. Oh, grabe! Tabangan unta kita sa Dios nga mahibaloan kini. Eksaktong ginasulti niini kanato sa kon asa man sa niini nga mga panid, nga ingon ka eksakto gikan niadto nga panahon hangtud niining panahona, hangtud sa pagtibawas, ug dili gyud kini mapakyas ni usa ka minuto.

<sup>106</sup> Daw sa unsa ka gamhanan ang Pulong sa Dios... Kaniadtong gibuhat sa Dios ang kalibutan ug gipahimutang kini sa orbit niini. Ug nagwali ako niadtong miaging gabii, Domingo sa gabii, daw sa unsa nga wala gyu'y bisan unsa nga napakyas. Aba, kining kalibutana nagatuyok gani sa ingon ka hingpit nga eksaktong masulti nila kanimo kung kanus-a molabay ang adlaw ug bulan, baynte ka tuig gikan karon, sa eksakto gyud nga minuto. Pero dili ko makasulti kaninyo, pinaagi sa unsa mang orasan nga aduna kita sa kalibutan; tungod nga mahimong ulahi kini og duha o tulo ka minuto kada bulan, o kaha nag-una og duha o tulo ka minuto, mao na kana ang pinakamaayo nga aduna kita. Dili gyud tà makahimo og unsa man nga ingon niana ka hingpit. Tungod kay, aduna lang ma'y bugtong butang nga hingpit, kana mao ang Dios. Ug ingon nga mao ra mismo ang Dios ug ang Iyang Pulong, busa hingpit gyud ang Pulong sa Dios.

<sup>107</sup> Ug kung masayran nato kini nga mga adlaw, nan masayran sàb nato sa eksakto kung kanus-a ang pagtibawas. Nasabtan n'yo ba? "Gigahin kini hangtud sa pagtibawas." Sa ika-24 nga bersekulo, "sa imong katawohan ug sa imong siyudad," nga mao ang Jerusalem. Sa ika-21...ika-24 nga kapitulo dinhi. Gihisgotan kini ni Jesus diha sa Mateo 24.

<sup>108</sup> Bueno, si Igsoong Collins, kung ania man siya niining buntaga, wala man gud ko kabalo kon ania ba siya o wala. Sa mga pangutana niadtong miaging gabii, nangutana siya og usa ka pangutana. (Okey ra man siguro kon isulti ko kini, Igsoong Collins.) Ang mahitungod sa, "Ang malaglagon nga pasipala," kita mo, kung unsa ang buut ipasabot niini?"

<sup>109</sup> Gihisgotan kini ni Jesus, sa Mateo sa ika-24 nga kapitulo, ug atong nahibaloan. Oo, Mateo 24:15. Karon pangitaon ko lang sà kini sa ingon ka paspas, aron inyong makita kung unsa kini, ingon nga naghisgot pud si Jesus sa mao gihapon nga butang dinhi, nga nagapahinungod kang Daniel. Mateo 24:15, para kaninyo nga nagasulat. Mao nga gusto ko unta, ang matag usa kaninyo karon, ilabina unyang gabii ug—ug sa sunod Domingo nga magdala mo og mga lapis ug mga papel, tungod kay kita...gawas lang kon aduna kamo'y teyp. 24, ug sa ika-15 nga bersekulo, "Ug busa inig..."

*Ug busa inig kakita ninyo sa malaglagon nga pasipala, nga gihisgotan ni Daniel nga propeta,...*

Hunahunaa n'yo! Upat ka gatus ug otsenta'y-tres, -kuwatro, -singko, otsenta'y-sais ka tuig na ang milabay. Upat ka gatus ug otsenta'y-sais ka tuig na ang milabay.

*...si Daniel nga propeta, nga nagatindog sulod sa dapit nga balaan,...*

Karon tan-awa n'yo sa inyong Biblia. Naka-parentesis kini.

*...(pasabta niini, ang magabasa:)*

<sup>110</sup> Bueno, nagapakigsulti Siya sa mga Judio. Gusto man nilang mahibalo kaniadto, “Unsa man usab kining templo? Kanus-a ba kini pagagun-obon? Kanus-a ba kini pagatukoron pag-usab? Kanus-a ba moabot ang panahon nga wala na’y usa ka bato sa ibabaw sa usa ka bato? Unsa ba ka dugay kini magalungtad?”

<sup>111</sup> Ingon Siya, “Inig kakita ninyo ‘sa malaglagon nga pasipala, sa pagtindog...’ si Daniel, ‘nagtindog sulod sa dapit nga balaan.’” Ingon pa, “Inig kakita ninyo niini nga natuman na, nan pasabta niini ang magabasa kung unsay ginahisgotan niya.”

Mao kana’y hinungdan nga nagaampo tà sa Dios, aron mapahayag kana sa ingon ka hingpit, nga wala gayu’y pagduhaduha. Tungod kay, dili man kita angay nga maghatag og kinaugalingon natong interpretasyon sa niana nga mga butang. Ginahanglan nga magaabot kana pinaagi sa MAO KINI ANG GINAINGON SA GINOO. Busa, ginapasagdan ko lang ùsa kana hangtud nga masabtan ko na.

Gipadayag kaniya ang tanang butang, ang “malaglagon.”

<sup>112</sup> Ug, timan-i n'yo, nga aduna kana’y dobleng kahulogan, sama lang sa, “Tawga ang akong pagawas sa Egipto.” Maingon nga gitawag pagawas ang Israel kaniadto, mao man usab si Jesus, nga Iyang Anak, gitawag pud pagawas.

Ug mahitabo kana sa ingon ka eksakto gayud, sa ingon ka sigurado nga nagatindog ako dinhi. Ug gibuhat Niya kini sa paagi, nga gililong Niya kining tanan, gililong ang tanan sa Iglesia. Oh, pag modangat na kita dinha, nianang unom-ka-pilo nga pagsabot, kung unsa nga gililong Niya kining tanan sa Iglesia, aron ang Iglesia magbantay gayud niini sa matag minuto, ingon nga wala gyud nasayod kung kanus-a Siya moabot. Apan karon nga hapit nang matapos ang kapanahonan sa Iglesia, nan andam na gayud kini karon alang sa Pag-abot, mao nga mangandam gayud.

<sup>113</sup> Kini mao ang usa sa pinaka mahinungdanon nga mga Kasulatan sa Basahon. Unsa ma’y ginabuhat niini? Ginapahayag niini ang pagtapos sa nasud sa mga Judio, sa mga tawong Judio. Kini nga Kasulatan, ang kapitoan ka semana, ginapahayag ug ginasulti niini sa ingon ka eksakto ang panahon nga nagsugod si Daniel kaniadto, hangtud sa pagtibawas. Ngani usa kini sa pinakamahinungdanon nga mga orasan. Pila man sa inyo ang nakadungog na kanako nga nagaingon, “Kung gusto n’yong

mahibaloan kung unsa na nga adlaw karon sa semana, tan-awa ang kalendaryo. Kung gusto n'yong mahibaloan kung unsa na nga panahon ang atong gikapuy-an, tan-awa ang mga Judio"? Husto kana. Mao kana ang kalendaryo sa Dios, nga gikuha gikan mismo dinhi. Ang si kinsa mang teologo, ang si kinsa mang makinaadmanon sa Biblia, ang si kinsa man, mosulti man kaninyo nga mao kini ang orasan, ang mga Judio.

Karon unsa na ba'y oras? Kita gayu'y...ang mga tawo, gipang-igang na, oh, ako...

<sup>114</sup> Wala kini'y kahilambigitan sa mga Gentil; kining Pito ka Selyo, Pito ka Hampak, Pito ka Kagul-anan, Pito ka Trumpeta, wala gyu'y kahilambigitan ni usa ka butang. Tungod ang Iglesiang Gentil anaa na man sa Himaya nianang panahona. Mao nga wala kini'y kahilambigitan kanato, nga Iglesiang Gentil. May kahilambigitan lang kini sa Israel. "Daniel, sa imong katawohan ug sa Jerusalem."

<sup>115</sup> Karon, ug ginapahayag pud niini ang mga kamatuoran nga ang Dios magapakighilambigit lamang sa mga Judio pag anaa na sila sa ilang yutang-natawhan. Alleluyah! Siguro dinha ko nahisgotan ang pinakaimportante nga bahin, dinha mismo.

Pero kanunay nilang ginaihap ang kadtong gikan sa panahon nga ang Israel kono atua didto niadtong panahon ni Daniel. Ug may usa ka bantugang magsusulat... Kay, kabalo ko nga ania karon ang pipila sa iyang mga sumusunod, mao nga dili lang nako isulti. Ug mao kana'y hinungdan nga aduna sila nianang tanang sayup nga pagkasabot.

<sup>116</sup> Kabalo ba mo kung unsa nga ang mga Millerite, adisir sila nahimong mga Seventh-day Adventist, kung unsay gibuhut nila dinhi? Niadtong 1919, nagsul-ob sila og mga pako, (nakita man ninyong tanan sa mantalaang Courier), ug nanganhi sila dinhi aron manglupad na kono sila, niadtong buntaga. Ila konong gibasi kadto sa kapitoan ka semana ni Daniel. Uh-huh, ang Millerite. Dayon, pagkahuman niadto, pinaagi ni Mrs. Ellen White, nga ilang babayeng-propeta, giilisan nila ug nagpatawag na sa ilang kaugalingon nga mga Seventh-day Adventist. Ug karon na pud giusab nila ang ilang ngalan og The Voice of Prophecy. Kita n'yo? Tulo ka nagkalainlaing ngalan sa mao ra nga kulto.

<sup>117</sup> Karon, apan sayup sila, tungod kay ginasulayan man nilang iaplikar ang kapitoan ka semana ngadto sa Judio ug Gentil. Ug miingon man unta Siya dinhi, "Para kini sa imong katawohan." Ug wala baya sukad-sukad nakighilambigit ang Dios sa Judio nga anaa gawas sa Palestina. Ug sa dihang ang Mesias, sa kapitoan, ug duha ka semana, gipatay na, (dili para sa Iyang Kaugalingon; kondili para kanato, mao nga gipatay Siya), napatlaag ang Israel, ug wala pa (gayud) nakabalik sa ilang yutang-natawhan hangtud sa nangaging pipila ka mga

tuig. Busa, dili apil sa pag-ihap kadto nga panahon para sa kapanahonan sa Iglesia. Nasabtan n'yo ba? [Nagaingon ang kongregasyon, "Amen."—Ed.]

Mao nga dili gyud mamahimo nga 1919. Aduna ko'y maipakita kaninyo nga nahitabo niadtong 1919, pero mao kadto ang higayon nga ang Manulonda, ang mensahe sa ikatulong Manulonda miabot ug nahitabo ang Kagul-anan. Eksakto. Apan dili kadto mao ang . . . Mao kadto ang higayon nga nahunong ang gubat sa usa ka misteryoso nga paagi. Hisgotan nato kana sa ika-7 nga kapitulo pag modangat na kita dinha, pag modangat na kita sa ika-7 nga kapitulo. Nadungog na man ko ninyo nga nagwali niana, sa makadaghan nang higayon, kita n'yo, sa dihang miingon ang mensahe sa Manulonda, "Pugngi ùsa ninyo ang upat ka hangin sa yuta hangtud nga amo nang maselyohan ang mga Judio, ang mga ulipon." Ug karon, padayon ra silang nanaghulat hangtud nga ang tibuok kapanahonan sa Gentil matapos na.

Dayon pagmoabot na Siya, unya—unya Iya nang selyohan ang mga Judio, og madawat na sa usa ka gatus kap-atan ug upat ka libo ang Espiritu Santo. Mao kana ang usa ka gatus kap-atan ug upat ka libo, nga gipangselyohan na. Pinadayag 7. Inyo na kining nabasa.

"Ug nakita ko ang daghan kaayo nga anaa na sa Langit," nakita ni Juan, "gikan sa tanang kabanayan, pinulongan, ug nasud, ug nanagtindog sila sa atubangan sa Dios, nga nanagdala og mga palmera diha sa ilang mga kamot, ug nanagsul-ob og maputi nga mga bisti, og nagaawit, 'Alleluyah! Amen! Himaya, kaalam, kadunganan, kalig-onan, gahum, maanaa sa atong Dios hangtud sa kahangturan. Amen!' nanagsinggit sila."

<sup>118</sup> Wala pa kaniadto nakasabot si Juan. Apan milingi siya ug nakita niya sa Bukid sa Sinai, (himaya) ang usa ka gatus kap-atan ug upat ka libo nga wala nahugawan og mga babaye. Mga Judio! Mga babaye, mga iglesia! Wala sila nagpamiyembro sa unsa man nga mga organisasyon, Lutheran, Methodist, Baptist, ug Presbyterian. Kondili sila gayu'y mga Judio gikan sa sinugdan, mga Orthodox, ug aduna sila'y templo didto, nga nagasimba didto sa Bukid sa Sinai. Kana mao ang usa ka gatus kap-atan ug upat ka libo. Kana'y pagkahuman na niini; nga ang Iglesia anaa na sa Himaya. Kita n'yo?

<sup>119</sup> Busa, sayup usab si Mr. Smith, mao gyud. Tungod kay, unsaon mo man pag-aplikar kana dinhi sa 1919, og walaon diay ang usa ka gatus kap-atan ug upat ka libo? Kung ingon niana mobalik kamo sa pagka-Russellite pag-usab. Kita n'yo? Kung ingon niana mobalik kamo mismo sa Russellite nga doktrina, nga, "Si Jesus miabot kono niadtong 1914, og niadtong 1919 gikuha Niya ang Iyang Iglesia, ug karon Siya'y usa kono ka mistikal nga Lawas nga nagalibot-libot sa yuta, og

banhawon. . . moadto kono sa lubnganan ni lola ug lubnganan ni lolo, ug banhawon silang tanan, kadtong tanan nga mga Russellite.” Binuang! Wala gyud kana’y kahulogan sa Pulong. Dili man kana motakdo nga husto. Dili, sir. Dili gayud.

<sup>120</sup> Apan, aduna ang Dios og Kamatuoran. Ug ang Dios lang Mao Ang makapadayag Niini ug magpahimutang Niini dinha, ug ipakita Kini sa ingon ka eksakto, nganhi kanato. Kita n’yo? Nagatoo ako nga buhaton gyud Niya. Wala ko mahibalo niini. Pero ginasulti ko kaninyo ang Kamatuoran. Wala ko mahibalo, apan nagatoo ako. Nagatoo ako nga buhaton gyud Niya.

<sup>121</sup> Busa, nakita n’yo, wala gyud nakighilambigit ang Dios sa mga Judio. (Gusto ko nga inyong hinumduman kini) samtang nga ang Israel. . .

<sup>122</sup> Mao kana ang higayon nga akong gisultihan kining igsoong lalaki nga nagalingkod dinhi, nga nakahisgot nga moadto kono siya sa Israel, likayi n’yo ang Israel! Pahilayo kamo niini, kamo nga mga nagahisgot nga kabigon n’yo ang mga Judio. Sa dili pa matapos kini nga Mensahe, makita ninyo nga kini’y MAO KINI ANG GINAINGON SA GINOO, pinaagi sa Pulong ug pinaagi sa Espiritu. Makabig ang Israel, nga tibuok nasud mismo, sa usa ra ka gabii. Mao kana ang ginaingon sa Biblia. Apan ang Ebanghelyo dili pa para kanila. Hinoon adunay pipila ka mga masupakon nga nanggawas, ug uban pa nga sama niana, nga misulod ug mga nanggawas sa kadaghanang mga Judio, nga misulod ug naluwas. Tinuod man kana. Nagatoo ko niana sa tibuok kong—kong kasingkasing.

Apan, hinumdumi, samtang anaa pa ang Israel gawas sa ilang nasud, dili gyud sila mamaluwas. Karon nagapamalik na sila. Ug mamaluwas sila, ingon nga tibuok nasud, sa usa ra ka adlaw. Mao kana’y ginaingon sa Biblia. Usa ka adlaw; bug-os gayud, nga mapahibalik, ang tibuok Israel ngadto sa Dios. Adunay usa ka gamhanang butang nga moigo sa Israel usa sa niining mga adlaw, nga magauyog sa tibuok nasud. Gani misinggit man ang propeta, ug miingon, “Sulod sa usa ka adlaw gibuhat mo kini.” Sa usa ra ka adlaw, makita nila Kini. Adunay mahitabo nga usa ka gamhanang butang.

<sup>123</sup> Sa akong opinyon, kana’y usa ka gamhanang propeta nga motungha ug mobarug sa atubangan sa Israel, ug magpamatuod kanila nga ang maong Mesias buhi sa gihapon. Kadtong Mesias nga ilang gisalikway kaniadto. . . ? . . .

<sup>124</sup> Ginabasa nila karon kanang gamay’ng Biblia, nga Biblia sa Israel. Ginabasa nila Kini gikan sa likod paingon sa atubangan, sa ingon-anang paagi nila ginabasa Kini. Ug kabalo na man mo kung unsa ang pagkasulat sa pinulongang Judio. Ug busa pag basahon nila Kini. . . Ug ang ginabasa nila kadtong gipadala kanila ni Lewi Pethrus, nga usa ka milyon nga mga Biblia. Ingon sila, “Kung kini nga Jesus. . .” Sila kadtong mga Judio nga gikan

pa sa Iran, ug didto, wala man gud sila nakadungog sukad-sukad og ingon-anang butang nga sama sa Mesias. Ug sa dihang andam na sila nga mobalik sa ilang yutang-natawhan, aba, ayaw nila unta nga mosakay sa mga eroplano. Nanagdaro gihapon sila gamit ang karaang mga pangdaro. Nabasa man ninyo kana sa *Look* magazine. Pila man ang nakabasa na nianang mga artikulo sa *Look* ug *Times* mag-...? Aba, nakabasa gyud diay kamo. Kita n'yo? Ayaw nila unta nga mosakay kaniadto. Pero mitindog kadtong tigulang nga rabbi didto ug miingon, "Hinumdumi n'yo, miingon baya ang atong propeta nga mamalik kita sa atong yutang-natawhan nga sakay sa mga pako sa usa ka agila." Alleluyah!

Mga nasud nanagkabulag, nagakahigmata na ang Israel,  
Mga ilhanan nga gipanagna na sa Biblia;  
Inihip na lang ang mga adlaw sa Gentil,  
inubanan sa mabug-at nga kasakit;  
"Balik na, Oh mga nangapatlaag, sa inyo mismong yutang-natawhan."

<sup>125</sup> Kinahanglan nga magmata na kamo. Nadungog n'yo na kini ug nadungog, ug nadungog na kini, pero moabot baya ang kaulahiang higayon, usa sa niining mga adlaw. Ngani ang Israel nagabalik na sa yutang-natawhan niini. Ang adlaw nga gitakda sa Dios nga mamahimong usa ka nasud ang Israel, mao sàb kana ang adlaw nga wala na'y usa pa ka Gentil nga maluwat.

<sup>126</sup> Pamatud-an ko kana pinaagi niining kapitoan ka semana, kung makita ko lang kana nga mga adlaw. Moadto man ko sa... aron tan-awon ang mga astronomiyang kalendaryo, ug—ug ang sa Julian, nga astronomiya, ug sa Romano, ug tanan na niana. Aduna pa ma'y pipila, sa kon asa man. Aduna gayud. Nasayod ang Dios niana, ug, Siya—mahimo Niyang ipadayag kana. Kita n'yo? Nasayod ko nga ang Julian nga kalendaryo adunay tulo ka gatus ug saisenta'y-singko ug ikaupat nga bahin nga adlaw, sa usa ka tuig. Busa, oh, makalibog na ang mga niini, apan aduna gyu'y kamatuoran, sa kon asa man.

<sup>127</sup> Ngani makita ko ang daghan kaayong mga kaiglesihan, daghan kaayong mga organisasyon, daghan kaayong mga tawo nga nagabuhat *niini*, ug may uban, "Maghimaya ka Maria," ug ang uban pud nagasimba *niini*, ug *niana*, og sa *uban pa*. Pero siguradong aduna gyu'y usa ka Tinuod, sa kon asa man. Siguradong aduna gyu'y usa ka Dios, sa kon asa man. Siguradong aduna gyu'y usa ka Mensahe, sa kon asa man. Ingon nga nakakita ko og mini nga mga propeta nga nanagpanungha, nagapanglihok nga may samang pagpang-ila, ug tanan nang matang sa ingon-anang mga butang nga nagatungha. Kung ingon niana, siguradong aduna gayu'y usa ka tinuod dinha, sa kon asa man, nga ginaawat-awatan sa mga mini.

<sup>128</sup> Nakakita pud ko og mga tawo nga unodnon, ug nanagsinggit, ug kung unsa na lang, ug inig gawas nagakinabuhi pud og tanan nang matang sa mga pagkinabuhi. Mao nga siguradong aduna gayu'y usa ka tinuod nga Balaang Espiritu dinha, sa kon asa man. Nakakita ko og mga tawo nga nagagawi nga mga relihoyoso, ug uban pa, ug gapaningkamot nga mahimong diosnon. Pero nasayod ko nga aduna gyu'y usa ka tinuod nga Dios, sa kon asa man. Adunay usa ka tinuod nga Espiritu, sa kon asa man, tungod kay usa lang man kana ka hipokrito ang nagawat-awat niana, usa ka karaang mini. Siguradong aduna gyu'y sa kung unsa man nga tinuod: usa ka tawo, usa ka katawohan, usa ka Iglesia, usa ka Dios. Aduna gyu'y usa ka butang nga tinuod, sa kon asa man, tungod kay mga pang-awat-awat lang man ang mga niini gikan niana. Aduna gayu'y usa ka butang nga tinuod, sa kon asa man.

<sup>129</sup> Nasulti ko na sa niining iglesia, ang mahitungod sa inyong mga gasa. Patalinghug mo sa inyong mga gasa; ipapabilin kana nga nakatakdo sa Biblia. Ayaw kamo pagdawat og usa ka pangpuli, ingon nga ang kalangitan napuno man sa mga butang nga tinuod. Ipapabilin nato ang mga tinuod. Ang tinuod lang ang atong batonan kay kon dili ayaw na lang pagbaton og unsa man. Amen.

<sup>130</sup> Bueno, ang pagtapos, mao'y kamatuoran nga makighilambigit lamang ang Dios sa Israel kon anaa na kini sa iyang yutang-natawhan. Ipananglitan ta kaniadtong ang Dios... sa pagbiya ni Abraham sa yutang-natawhan ug miadto sa Egipto, unsa ma'y nahitabo? Mipahilayo siya gikan sa kabubut-on sa Dios, ug wala gyud gipanalanginan hangtud nga mibalik siya sa iyang yutang-natawhan. Wala nakighilambigit kaniya ang Dios, walay ni usa ka panan-awon, walay unsa pa man, hangtud nga mibalik siya sa iyang yutang-natawhan.

<sup>131</sup> Matikdi n'yo ang Israel kaniadtong nahiadto sila sa Egipto, sulod sa upat ka gatus ka tuig. Walay ni usa ka milagro, walay ni usa ka ilhanan, wala ni usa ka butang ang nahitabo sa taliwala nila, wala pu'y nahisulat sa kasaysayan sa Basahon. Mao ra nga nubenta'y-nuebe, ang nagaadto sa simbahan, nagahalad og karnero, moingon og "Maghimaya ka Maria," o kung unsa man, og mobalik na. Pagkasunod tuig, mao gihapon. Nanaglaisay ang mga sacerdote, "Si Rabii *Ingon ani-ug-ingon ana!* Among pilion si Rabbi *Ingon ani-ug-ingon ana*. Aduna man siya'y mas maayo nga kahibalo. Mas daghan siya'g nahibaloan mahitungod sa mga Egiptohanon." Mahibaloan mo na lang, ang mga Egiptohanon ug—ug silang tanan, mao ra diay.

<sup>132</sup> Ingon niana usab ang nahitabo sa iglesia. Mipaingon kitang tanan sa pagka-Methodist, o Baptist, o Presbyterian. "Ug aduna kami og digri gikan sa Hartford! Aduna kami og digri gikan sa Wheaton! Aduna kami og digri gikan sa kung asa man, o sa Bob Jones! Kami, aduna pud kami'y Bachelor of Art! Aduna kami og

D.D., LL.D., o unsa pa man!” Unsa man diay ang gidangtan niini? Usa ka pundok sa mga kabuangan.

Ingon niana usab sa Egipto kaniadto. Ug wala gyud nakighilambigit ang Dios sa Israel hangtud nga mibalik kini sa iyang yutang-natawhan.

<sup>133</sup> Paminawa ko ninyo! MAO KINI ANG GINAINGON SA GINOO, ang Dios dili makighilambigit sa Iyang Iglesia gawas kon mobalik Siya sa yutang-natawhan, ang Mensahe sa panahon. Pamalik na mo sa orihinal! Pahilayo na mo sa inyong pang-Methodist, pang-Baptist, pang-Presbyterian nga mga ideya; sa inyong pang-Pentecostal, pang-Assemblies, pang-Oneness, pang-Threeness, ug pang-Fiveness, o unsa man kana; church of God, Nazarene, Pilgrim Holiness, church of Christ, og tanan nang pang-anticristo nga mga kalihokan! Ug akong naamgo nga naigo gyud niini ang kalibutan. Mao nga ang tanan sayup; ang tanan iya gyud sa yawa. Oh, grabe! Hinoon aduna ma'y diosnong mga mga kalalaken-an diha sa matag usa niana. Adunay diosnong mga tawo sa matag usa niana nga mga kalihokan. Apan ang organisasyon, mismo, dili man iya sa Dios, ug dili gayud kana panalanginan sa Dios. Wala gyud Niya sukad gibuhat kana.

<sup>134</sup> Ginahangyo ko ang si kinsa man nga magsasaysay (madungog man ninyo kini sa teyp) nga magsulat ug isulti kanako nga sa matag higayon, nga ang iglesia nag-organisa, dili ba gipahimutang na lang kana sa Dios diha sa estante ug wala na nakighilambigit pa niana. Sultihi ko kon kanus-a ba Niya gibangon pag-usab ang Lutheran, ang Wesley ug ang mga Methodist, o kaha ang Pentecostal. Wala na gayud! Kana nga organisasyon anaa na lang dinha, ug giut-ot na ug dunot na! Mikuha man ang Dios og mga indibiduwal ug gipaningkamotan nga itudlo ang mga tawo pabalik sa ilang yutang-natawhan. Ug dayon, ang maong mga indibiduwal nahimo mang ingon ka huyang ug mora'g mga bayot, tungod sa kung unsa nga matang sa digri, hangtud nga nag-organisa hinoon sila og usa na usab ka organisasyon, nga nagkasamot pa ka lala kaysa kung unsa ang kahimtang niini sa sinugdan.

<sup>135</sup> Apan, sa kon asa man, sigurado gayud, nga si Jehovah adunay usa ka tawo nga mahimo Niyang kontrolon sa Iyang mga kamot, nga dili mopakigkompromiso kanilang . . . -diosnon, dili-diosnong organisasyon; nga magpabalik sa mga tawo ngadto sa Bato, nga mao si Jesus Cristo, pabalik sa orihinal nga pentecostes ug sa orihinal nga Espiritu Santo, nga may orihinal nga mga ilhanan ug orihinal nga mga katingalahan. Sigurado gayud aduna Siya'y usa, sa kon asa man, nga dili mapukan ilalum sa kung unsa man nga matang sa pagpanglutos, pagsalikway, pagpahawa, mga pagsupil, o unsa pa man; kondili magpabilin ra gayud.

Wala sukad-sukad gipanalanginan sa Dios ang Israel hangtud nga midangat kini sa yutang-natawhan niini.

<sup>136</sup> Dili sàb kamo panalanginan sa Dios, ingon nga usa ka Methodist, Baptist, Presbyterian, Katoliko, o usa ka Pilgrim Holiness, Nazarene, church of Christ, o—o usa man ka Pentecostal nga organisasyon. Dili gyud Niya kamo panalanginan sa ingon-anang kahimtang. Pamalik mo sa yutang-natawhan, sa sinugdan, pabalik sa pentecostal nga kasinatian sama sa nahitabo niadtong Adlaw sa Pentecostes sa dihang gibag-o sa Gahum sa buhi nga Dios kadtong liboan ka mga tawo, ug gipadilaab ang ilang kasingkasing pinaagi sa Kalayo sa Dios, nga nagpakita og tinuod; dili ingon nga giawat-awat lang nga mga ilhanan, dili nga kung unsang hinimo lang nga telepatiya, dili nga kung unsang pagsundog-sundog, ug midangat sa usa ka pagpakig-indigay nga sama sa aduna kita sa Amerika. “Kinsa man ang makapahigayon og may pinakadakung tolda?” O, “Kinsa man ang makapahigayon og pinakadaghang mananambong?” Unsa ma’y kalahian niana sa Dios? Ang gusto sa Dios mga tawo man nga matinuuron ang kasingkasing, dili ang dakung panon. Pero kitang tanan midangat na man sa usa ka pagpakig-indigay, og lumbaamay. Pagkamakauulaw, ang manigurado kung makaaghat pa ba kita og usa pa ka libo sa atong organisasyon. Makauulaw gayud. Ang gusto man unta Niya nga mobalik kita sa Kamatuoran, mobalik sa Espiritu, mobalik sa husto nga Kahayag, mobalik sa dalan diha kang Cristo, mobalik sa Kamatuoran. Unsaon na lang Niya pagpanalangin kanato kung ingon niana kita? Dili gayud.

<sup>137</sup> Wala gani Niya gipanalanginan ang Israel hangtud nga mibalik sila sa ilang yutang-natawhan. Ug sa pagbalik na nila sa yutang saad, hinay-hinay nang nagkahitabo ang mga ilhanan ug mga katingalahan. Nagpadala Siya og usa ka tawo sa taliwala nila, nga ginganla’g Moises. Unsa ma’y gidala niining si Moises sa pag-adto didto, usa ba ka hinashasan nga teolohiya? Miadto ba siya nga dala ang usa ka digri sa Bachelor of Art? Miadto ba siya nga dala ang usa ka LL.D., Ph.D.? Miadto siya nga dala ang gahum ni Jehovah, ug dala ang usa ka mensahe, “Balik na mo, gikan niining yutaa, paingon sa atong yutang-natawhan. Balik na, Oh, mga nangapatlaag, sa inyo mismong yutang-natawhan.” Amen!

<sup>138</sup> Sulod sa halos duha ka libo ka tuig, atua ang mga Judio sa gawas sa ilang yutang-natawhan, nangapatlaag ngadto sa upat ka hangin sa yuta. Madugayan gyud ta og pila ka semana sa niini nga Mensahe, kung hisgotan pa nato ang mga detalye niini. Mahimo natong subayon ang Israel ug ipakita kaniadtong gipapatlaag sila sa Imperyong Romano, tungod sa ilang pagsalikway sa Mesias; kung unsa nga nagkatibulaag kini ngadto sa matag nasud sa ilalum sa Langit.

Kung balikan tà si Jacob, si Israel, dinha sa Genesis 44 ug

45, ug ipakita dinha kung giunsa niya pagpanalangin kadtong mga patriarca ug gisultihan sila sa ingon ka eksakto kon unsa ang ilang mamahimong kahimtang sa kaulahiang mga adlaw. Ug mahimo kong itudlo kaninyo sa eksakto (ang matag nasud) sa Israel, nga ang matag banay sa Israel, eksaktong anaa mismo karon sa mga nasud nga gikaingon na. Ug ania na kita karon.

<sup>139</sup> Ang Judio nga hingsayran nato, dili man kana mao ang tinuod nga Judio. Ang tinuod nga Judio mao kanang tinuod nga Orthodox nga wala sukad gihugawan ang iyang kaugalingon sa mga butang nga iya sa kalibutan, nga wala migawas ug nagpamiyembro sa ubang mga iglesia. Mao kana mismo ang magabalik didto, nga nabuhi pinaagi sa keso ug tinapay, ug dinha sa mga kabakiliran, tungod nga gidid-an man sila nga makasulod sa daang siyudad. Kinahanglan nilang magtukod og siyudad sa niini nga bahin, sa yuta nga walay mga tawong nagapuyo, og aduna pa'y mga machine gun nga nakapunting sa duha ka direksyon. Apan hinay-hinay na man siyang nagapanalingsing. Amen, ug amen! Haduol na gyud ang panahon.

<sup>140</sup> Atua si Ismael ug si Isaac, nga atua karon didto, naglalisay mahitungod sa yuta, hangtud karon, apan panag-iya man kini sa Israel. Kung mahitabo man nga makaadto kamo sa bag-ong Jerusalem, dili nila kamo pasudlon sa daang Jerusalem. Kinahanglan n'yo una nga moadto didto ug ilang isaysay ang tanan kanimo, ang mga Arabo, dayon dalhon ka na sa pikas bahin. Kana mao ang mga anak ni Ismael. Apan, kadali lang, moabot ang panahon nga bawion na kana sa mga anak sa Dios. Tinuod. Tukoron na pag-usab ang Jerusalem. Pagabuhaton na usab ang adlaw-adlaw nga paghalad.

Ug ang anticristo magahimo og pakigsaad kanila sa ulahing pito ka semana. Ug sa taliwala niana, lapason niya ang pakigsaad, og kabigon silang tanan ngadto sa Katolisismo. Magakaylap ang dulumtanan sa maong tibuok butang, nga sama niana, ug dayon mahitabo na ang katapusan.

<sup>141</sup> Matikdi, “kapitoan ka semana.” Oo, halos duha ka libo ka tuig nga atua sila sa halayo; gipapatlaag man sila kaniadto, ang ilang mga ginikanan; sama ra niadtong gipagahi ang kasingkasing ni Faraon, gipagahi pud Niya ang kasingkasing ni Hitler. Mao nga minilyon kanila ang nangamatay. Tan-awa n'yo kining si Eichmann, nga sad-an sa pagpamatay sa unom ka milyon nga mga Judio. Unom ka milyon kanila, nga mga kalag sa tawo, mga masuso, mga bata, mga hamtong, og tanan gipamatay; ni Eichmann, nga usa ka tawo. Tan-awa n'yo ang Rusya, kung unsa nga gipapahawa ninyo sila didto. Gipapahawa nila sila sa bisan asa. Nahimo gyud silang usa ka sinalikway nga nasud.

<sup>142</sup> Apan tungod sa gugma sa ilang salapi, nangbalik sila pag-usab. Pero kadtong diyutay'ng minorya mibalik ngadto sa

Palestina. Amen, mga igsoon! Pag makita na ninyo siya nga hinay-hinay nang nagabalik sa iyang yutang-natawhan!

<sup>143</sup> Ngani daghan na man silang atua didto nga halos usa na ka gatus kap-atan ug upat ka libo. Ug unsa na ma'y mahitabo? Maila na nila ang ilang Joseph. Ayaw mo'g kabalaka. Oo, sir. Ug atua silang tanan didto nga nagahulat niana nga mahitabo. Ug sa mismong takna nga...

<sup>144</sup> Gideklara na man sila sa mga kanasuran ingon nga usa ka nasud, niadtong miaging tuig lang. Pag mahitabo na kana, haduol na kita sa katapusan, og sakgawon na ang Iglesiang Gentil. Busa, unsa mang oras, mahimo nang mosulti ang Dios, "Ang Israel ang Akong katawohan." Pag mahitabo na kana, tapos na ang mga Gentil.

<sup>145</sup> "Ilang pagatamakan," ang ingon ni Jesus, sa Mateo 24. "Ang malaglagon nga pasipala, ilang pagatamakan ang mga kuta sa Jerusalem hangtud nga matapos na ang panahon sa Gentil." Sa dihang matapos na, dayon magabalik na ang mga Judio ngadto sa Jerusalem, aron tukoron pag-usab ang templo ug ibalik ang pagsimba sulod sa maong templo. Hisgotan ra nato kining tanan sa mosunod nga mga Mensahe, ang kapitoan ka semana sa unom-ka-pilo nga katuyoan.

Karon basahon ko kana sa dili pa ang pagtapos, tungod kay oras na gyud para manguli na kita, dayon mobalik ra ta sa alas siete unyang gabii.

<sup>146</sup> Ang una, una, kung ginasulat n'yo kini, "Aron sa paghuman sa kalapasan." Daniel, sa ika-9 nga kapitulo, ika-24 nga bersekulo. "Aron sa paghuman sa kalapasan," una. "Aron sa pagtapos sa sala," ikaduha. "Aron sa paghimo sa pagpasig-uli alang sa kasal-anan," ikatulo. "Aron sa pagpasulod sa walay-katapusang pagkamatarung," ikaupat. "Aron sa pagmatuod sa panan-awon ug sa panagna," ikalima. "Aron sa pagdihog sa labing Balaan," ikaunom. Ug mao kana ang atong pagahisgotan unyang gabii. Ang Dios, ang magpahinabo niini!

<sup>147</sup> Karon kadali lang, subliron ko kini pag-usab, aron makuha gyud ninyo kini. Una, "humanon ang kalapasan." Ikaduha, "taposon ang sala." Ikatulo, "maghimo og pagpasig-uli alang sa kasal-anan." Ikaupat, "ipasulod ang walay-katapusang pagkamatarung." Ikalima, "selyohan ang panan-awon ug ang panagna." Ikaunom, "dihogan ang labing Balaan."

Basahon ko usa kini para sa inyo karon, gikan sa—gikan sa Biblia. Sa ika-24 nga bersekulo kini.

*Pito...semana mao'y tagal ibabaw sa imong katawohan (ang mga Judio) ug sa imong—sa imong balaang siyudad (Israel, mga Judio, Jerusalem), sa paghuman...sa mga kalapasan (una),...sa pagtapos sa sala (ikaduha),...sa paghimo sa mga pagpasig-uli alang sa kasal-anan (ikatulo),...sa pagpasulod*

*sa walay-katapusang pagkamatarung (ikaupat), ug sa pagmatuod sa panan-awon (ikalima)—sa panan-awon ug panagna, ug sa pagdihog sa labing Balaan (ikaunom).*

<sup>148</sup> Mao kana mismo ang Iyang giadto para isulti kang Daniel, nga pagabuhaton, ug dayon mahitabo na ang katapusan.

<sup>149</sup> Bueno, unyang gabii hisgotan nato kung unsa kanang mga butanga, ug hibaloon kung unsa na kita ka haduol dinha. Ug dayon pagkasunod Domingo, ipahayag ug ipahimutang kining mga elemento sa maong panahon sa ingon ka eksakto kon asa na kita karon. Gihigugma ko Siya.

<sup>150</sup> Nagabalik na ang Israel sa ilang yutang-natawhan, ang Israel. Isulti ko lang kini karon samtang. . . sa hunahuna ko dili na kini maapil sa teyp. Isulti ko lang kini. Sa mismong takna nga ang Israel nahimong usa ka nasud. . . Ang hinungdan nga dugay ko nang gitooan, sa atubangan sa akong mga magtutuon dinhi, nga may sa kung unsang butang nga aduna ko'y kahilambigitan niini, sa dili pa ako mamatay, sa pagpahibalik sa Israel ngadto sa Ginoo. Tungod kay, kaniadtong mismong takna, sumala sa tsart sa Pan American, nga gideklara ang Israel ingon nga usa ka nasud, sa unang higayon sulod sa duha ka libo ka tuig sukad niadtong nangapatlaag sila, dili ingon nga usa ka katawohan; mao man pud kadto ang mismong takna, tukma gayud niadtong taknaa, nga gihinagbo ako didto sa Manulonda sa Ginoo ug gisugo ako sa . . . nga dala ang Ebanghelyo. Sa mao ra mismo nga petsa, ika-7 sa Mayo, 1946.

<sup>151</sup> Karon, bueno, may usa pa ka butang nga gipahibalo kanako. Kini'y "magapasig-uli sa kasingkasing sa mga anak ngadto sa mga amahan, ug sa kasingkasing sa mga amahan ngadto sa mga anak," nga mao ang Mensahe. Matikdi, ang Malaquias 4 (dili ang 3), 4 mismo!

<sup>152</sup> Usa pa ka butang. Sa dihang si Billy, nga akong anak, ug kami, ni Igsoong Ern Baxter, nagbiyahe mi kaniadto paingon na unta sa Palestina, human namong mahimamat ang mga Judio didto sa panagtigum ni Igsoong Arganbright, ug nasaksihan nila ang panagtigum. Nagpadala man si Lewi Pethrus og mga Biblia didto. Ug ingon siya. . . Miduol kadtong mga Judio, miingon, "Kung magpatawag ka lang og usa ka grupo sa mga lider sa Israel, ang buut kong ipasabot, dili kining mga bag-ong rabbi nga dunay mga seremonya, kondili ang ipatawag mo kadtong tinuod gyud nga Israelinhong mga lider. Ug nabasa namo kining Bag-ong Tugon, ug nasayod kami nga pag moabot na ang Mesias, isulti Niya kanamo ang ingon niining mga butang, sama niadtong babaye sa Samaria. Nasayod kami tungod miingon man si Moises nga ang among Mesias mamahimong usa ka propeta. Ug kung masultihan mo sila ug maipakita kanila, pinaagi sa Kasulatan," nga atong pagahisgotan sa Mensahe

unyang gabii, “nga kinahanglan diay nilang mabutahan ug pagahion ang ilang mga kasingkasing, aron nga mahinabo ang panahon sa Gentil, aron nga magkaaduna kami og panahon para sa pagpasig-uli sa mga Gentil. Ug gipagahi ang ilang mga kasingkasing eksaktong sama gayud sa nahitabo sa panahon ni Joseph, ug uban pa. Ug dayon dalhon ang maong mga Judio sa usa ka punto, nga tawgon kadtong mga kalalaken-an gikan dinha sa mga mananambong, sama lang sa ginahimo mo sa niining mga Gentil dinhi, pinaagi nianang pagdihog sa Espiritu. Tungod kay,” ingon sila, “kung kining Jesus, kung Siya man mao ang Mesias, ug ang imong pulong tinuod, kung ingon niana Siya’y dili patay, ug Siya’y buhi gayud. Ug kung buhi Siya, gisaad man Niya nga maanaa sa Iyang. . . sa ala- . . . Iyang alagad—mga alagad, sa Iyang mga tinun-an. Ug kung makita namo Siya nga mamuhat og ilhanan nga iya sa propeta, nan motoo gyud kami nga Siya mao ang Mesias.”

Pagkahingpit nga butang, husto gayud. Dayon, unsa ma’y resulta niana? Mahimugso ang usa ka nasud sulod sa usa ra ka adlaw, sa taliwala sa mga lider. Ang matag usa kanila moingon, “Naila na namo kini.” Pag ang rabbi na ang mosulti niana, mao na gyud kana. Mahimugso ang usa ka nasud sulod sa usa ra ka adlaw. Mahimugso ang Israel sulod sa usa ra ka adlaw.

<sup>153</sup> Ug paingon na unta ako didto, ug atua na ako sa Cairo, Egypt, nga bitbit ang akong tiket, ug kinse o baynte minutos na lang para magtawag na. Hapit na sila nga magtawag niadtong tungora. Ug milakaw sa ko para makita ang usa ka gamay’ng ebony, usa ka gamay’ng elepante nga ginama gikan sa ebony, nga usa—usa ka dakung bangkil sa elepante. Ipadala ko unta kadto sa higala kong doktor, nga si Dr. Sam Adair, para pangdat-ol sa papel. Ug ginatan-aw ko kadto. Ug Aduna Sa Kung Unsa miingon kanako, “Dili pa kini ang oras. Pahilayo sa Palestina.”

<sup>154</sup> Bueno sa hunahuna ko, “Ako lang man ang nagahunahuna niana.” Ug nagpadayon ra ko.

Aduna Sa Kung Unsa na pu’y miingon, “Dili pa kini ang oras.”

<sup>155</sup> Ug migawas ako sa silonganan sa eroplano. Gihangad ko ang akong ulo ngadto sa Dios. Ingon ko, “Dios, Ikaw ba kining nagapakigsulti kanako?”

<sup>156</sup> Miingon, “Dili pa kini ang oras. Pahilayo sa Palestina. Dili pa kini ang panahon.” Dayon gidala ko ang akong tiket ug gipausab kadto, ug migikan didto paingon sa Roma, ug mibalik sa Lisbon, sa Portuguese, ug gikan didto mibalik na ko sa Estados Unidos.

<sup>157</sup> Dili pa kadto ang oras. Tungod wala pa man mapuno ang pagkadautan sa mga Gentil, nga papuno pa lang ang copa. Apan sa umaabot nga adlaw mapuno gyud kana, ug magpadala na didto ang Dios og usa ka tawo nga usa ka propeta, ug magpamatuod kanila. Nagasalig ako nga ipatungha siya sa

Dios sa gilayon, kon kinsa man siya, nga ipatungha siya sa gilayon. Nagatoo ko nga siguradong moabot kana. Mao kana'y hinungdan nga ginatun-an nato kini, ingon nga haduol na kaayo kita.

<sup>158</sup> Ug, hinumdumi, nga sa mismong takna nga dawaton na sa mga Judio si Cristo, ang Iglesiang Gentil gilalin na. Dayon igabubo na ngadto sa mga Gentil ang mga hampak, ang Kasakitan.

<sup>159</sup> Ug—ug nganong nagapanudlo man ang mga kalalaken-an, ang mga bantugang magtutudlo, ug nagatuon usab niining Biblia nga sama niini, ug moingon nga ang Iglesia moagi kono sa panahon sa Kasakitan, sa dihang wala man ni usa ka Kasulatan diha sa Bibla nga nagaingon niana! Wala gyud sila'y nasabtan ni usa.

<sup>160</sup> May usa ka lalaki nga miingon kanako, dili pa lang dugay, miingon, “Oh, gitudlo man ni Igsoong McPherson nga ang Iglesia moagi kono sa Kasakitan, tungod kay kita man kono ang magadan-ag nga mga kahayag nianang panahona.” Ang Israel na ang magadan-ag nianang panahona, dili ang mga Gentil.

Human nang gisakgaw ang mga Gentil nianang tungora, ang Iglesia. Tungod dili man sila kinahanglan nga moagi pa sa Kasakitan. “Nagbuga ang dragon og tubig gikan sa iyang baba,” sa ika-17 nga kapitulo, “ug nakiggubat sa mga nahibilin,” sa nagakatulog nga mga dalagang ulay. Dili... Gisakgaw na niana ang tinuod nga Iglesia. Atua na Siya sa pang-Kasal nga Panihapon sulod niining, espasyo sa panahon diin mahitabo ang pang-Kasal nga Panihapon, sa kaulahiang semana. Ug sa nianang panahona pud magsugod ang Kasakitan, sa dihang ang mga dulon ug mga pagpanglutos mangahitabo sa mga kaiglesiahan, mga ingon nianang butang.

Dayon, sa katapusan, diha sa ika-19 nga kapitulo, ania ang Pangasaw-onon nga nagaabot uban ang Iyang Pamanhonon. Alleluyah! “Hari sa mga hari, ug Ginoo sa mga ginoo; nga ang bisti gikatuslob sa Dugo, ug ang Langitnong panon nagasakay sa puti nga mga kabayo, nga kauban Niya. Ania na ang Pangasaw-onon nga nagaabot, aron mopuwesto na sa Iyang puwesto para sa Milenyum. Amen! Oh!

Blessed be the Name, oh, blessed be the Name,  
Blessed be the Name of the Lord;  
Blessed be the Name, oh, blessed be the Name,  
Blessed be the Name of the Lord.

Jesus is the Name, Jesus is the Name,  
Jesus is the Name of the Lord;  
Jesus is the Name, oh, Jesus is the Name,  
Jesus is the Name of the Lord.

Magnify His Name, oh, magnify His Name,  
Oh, magnify the Name of the Lord;

Magnify the Name, oh, magnify the Name,  
Magnify the Name of the Lord.

<sup>161</sup> Unsaon man ninyo paghimo niana? Himoon n'yo Kini nga halangdon sa inyong kinabuhi. Ikinabuhi n'yo ang usa ka pagkinabuhi nga masulti nila, "Mao kana usa ka alagad ni Cristo." Sa ingon-anang paagi n'yo ginapadaku ang mao nga Ngalan. Atong tan-awon. Oh, di ba ginahigugma man ninyo Siya? Oh, my! Ang atong hamubo nga awit karon:

Sa usa ka pasungan kaniadto, nasayod ako nga  
mao gayud kadto,  
Usa ka Bata ang nahimugso aron luwason ang  
katawohan sa ilang kasal-anan.  
Nakita Siya ni Juan sa may baybayon, ang usa  
ka Cordero hangtud sa kahangturan,

Kanang Cordero nga dala-dala ang Pito ka Selyo, Usa  
lamang sa Langit ug yuta ang may kasarang nga motangtang  
niana.

In a manger—in a manger long ago, I know it's  
really so,  
A Babe was born to save men from their sin.  
John saw Him on the shore, the Lamb for  
evermore,  
Oh, blessed be the Name of the Lord.  
Oh, blessed be the Name, oh, blessed be the  
Name,  
Blessed be the Name of the Lord;  
Blessed be the Name, blessed be the Name,  
Blessed be the Name of the Lord.

<sup>162</sup> Gusto ko gayud nga mosimba. Di ba kamo man usab? Karon, wala kita nagaanhi sa simbahan aron lang makadungog og usa ka wali; hinoon apil na kana. Apan nagaanhi tà sa simbahan aron magsimba, magsimba sa Espiritu ug sa Kamatuoran. Nadungog n'yo na ang Kamatuoran, mao kana ang Pulong. Kita n'yo? Karon, ang pagsimba, mao ang pagpahayag sa imong kaugalingon nganha Kaniya. Kita n'yo?

*Oh, I Love That Man Of Galilee*, hatagi kami palihog og tono niana. Oo, sir. Kabalo ka ba niana, Teddy? Nakalimot na man gud ko. Atong tan-awon. Atong tan-awon.

Oh, I love that Man from Galilee, from Galilee,  
For He's done so very much for me.  
He's forgiven all my sins, placed the Holy Ghost  
within;  
Oh, I love, I love that Man of Galilee.  
The publican went to pray in the temple there  
one day,  
He cried, "O Lord, be merciful to me!"

He was forgiven of every sin, and a deep peace  
placed within;

He said, "Come, see this Man from Galilee."

Oh, I love that Man from Galilee, from Galilee,  
For He's done so very much for me.

He's forgiven all my sin, placed the Holy Ghost  
within.

Oh, I love, I love that Man of Galilee.

The lame was made to walk, the dumb was  
made to talk,

That power was spoken with love upon the sea.  
The blind was made to see, I know it could only  
be

The power of that Man from Galilee.

Oh, I love that Man from Galilee, from Galilee,  
For He's done so very much for me.

He's forgiven all my sin, placed that Holy Ghost  
within.

Oh, I love, I love that Man from Galilee.

Paminawa n'yo kining usa:

The woman at the well, He all her sins did tell,  
How five husbands she had at that time. (Siya  
kadto.)

She was forgiven of every sin, and the deep  
peace came within;

Then she cried, "Come, see that Man from  
Galilee!"

Oh, I love that Man from Galilee, from Galilee,  
For He's done so very much for me.

He's forgiven all my sin, placed the Holy Ghost  
within.

Oh, I love, I love that Man from Galilee.

Gihigugma ko Siya. Dili ba kamo usab? Sa tibuok kong  
kasingkasing! Dili ba? Dili ba Siya kahibulongan?

Oh, wonderful, wonderful, Jesus is to me,  
(Unsa man Siya?)

Counsellor, the Prince of Peace, the Mighty  
God is He;

Oh, saving me, keeping me from all sin and  
shame,

Wonderful is my Redeemer, praise His Name!

Iduko lang nato ang atong mga ulo karon ug pamalandungan  
kini.

I once was lost, but now I'm found, I'm  
free from condemnation, (Ang mga nasud  
nanagkabulag; dili kana igsapayan.)

Jesus gives liberty and a full salvation;  
 He is saving me, He is keeping me from all sin  
 and shame,  
 Wonderful is my Redeemer, praise His Name!  
 Oh, wonderful, wonderful, Jesus is to me,  
 Counsellor, the Prince of Peace, Mighty God is  
 He;  
 Saving me, keeping me from all sin and shame,  
 Wonderful is my Redeemer, praise His Name!

Oh, palandunga n'yo kini!

I once was lost, now I'm found, I'm free from  
 condemnation,  
 Jesus gives liberty and a full salvation;  
 Saving me, (Unsa ma'y ginabuhay Niya?)  
 keeping me from all sin and shame,  
 (Nagapaibabaw na niini.)  
 Oh, wonderful is my Redeemer, praise His  
 Name!

Karon magdungan ta!

Oh, wonderful, wonderful, Jesus is to me,  
 Counsellor, the Prince of Peace, Mighty God is  
 He;  
 Why, saving me, keeping me from all sin and  
 shame,  
 Wonderful is my Redeemer, praise His Name!  
 Oh, how I love Jesus, (Himaya!)  
 Oh, how I love . . .

Malipayon kaayo ko nga luwas ako! Malipayon kaayo ko nga  
 nagahulat alang sa Iyang Pag-abot!

Oh, how I love Jesus,  
 Because He first loved me.

Karon ipataas nato ang atong mga kamot, kung sinsero kita  
 niini.

I'll never forsake Him,  
 I'll never forsake Him,  
 I'll never forsake Him,  
 Because He first loved me.

<sup>163</sup> Ginahigugma n'yo ba Siya? [Nagaingon ang kongregasyon,  
 "Oo."—Ed.] Kung ingon niana, kinahanglan maghigugmaay  
 kamo sa usa'g usa. Kay, kung dili n'yo sila ginahigugma nga  
 makita ninyo dinhi, nan unsaon man ninyo sa paghigugma  
 Kaniya Nga wala ninyo makita? Maglamano hay kita sa usa'g  
 usa, og moingon:

Oh, how I love Jesus,  
 Oh, how I love Jesus,

Oh, how I love Jesus,  
Because He first loved me.  
I'll never . . .

Ipataas n'yo ang inyong mga kamot nganha Kaniya karon.  
Ingon-ana.

. . . forsake Him,  
I'll never forsake Him,  
I'll never forsake Him,  
Because He first loved me.

<sup>164</sup> Hunahunaa ninyo, gipadayag Niya ang dakung kapadayagan nganhi kanato. Dili ba ginahigugma man nato Siya? Dili ba Siya kahibulongan? Mapasalamaton gayud kita sa atong Ginoong Jesus; nga wala kita sukad-sukad gibiyaan. "Ania karon, Ako magauban kaninyo sa kanunay, hangtud sa . . ." Nangalipay ba kamo sa *Ang Kapitoan Ka Semana Ni Daniel*? [Nagaingon ang kongregasyon, "Amen."—Ed.] Oh, dili ba ginahigugma nato Siya? Unsaon man paghimo niana?

My faith looks up to Thee,  
Thou Lamb of Calvary,  
Saviour . . .

Simbaha lang ninyo Siya, gikan mismo sa inyong kasingkasing.

Now hear me while I pray,  
Take all my sins away,  
O let me from this day  
Be wholly Thine!

While life's dark maze I tread, (Kitang tanan  
nagaagi gyud niana.)  
And grief around me spread, (Oo, Ginoo.)  
Just be Thou my Guide; (Ginagiyahan Mo  
gayud ako latas niini, Ginoo!)

O bid darkness turn to day,  
Wipe sorrow's fears away,  
Nor let me ever stray  
From Thee aside.

[Si Igsoong Branham nagsugod na sa paglaylay og *My Faith Looks Up To Thee*—Ed.]

Strength to my fainting heart,  
My zeal inspire;  
Bid darkness turn to day,  
Wipe all my fears away,  
O let me from this day  
Be wholly Thine!

<sup>165</sup> Oh Jesus, nakita namo nga haduol na kami sa usa ka butang. Ngani gihisgotan kini ni Isaias nga propeta; gihisgotan kini ni

Jeremias. Gisubli ni Daniel ug nakita ang gikasulti nila kaniadto. Napukaw gayud ang iyang kasingkasing tungod niadto, ug iyang—iyang gipaatabang ang iyang nawong ngadto sa Langit. Nagpuasa siya, nga nakabisti og sapot nga sako ug mga abo. Gitiguha niya nga magpatalinghug, aron nga iyang mapasidan-an ang mga tawo.

<sup>166</sup> Ginoo, nakita namo pinaagi sa mga Basahon, usab, sa Imong Basahon, sa Basahon ni Isaias, sa Basahon ni Jeremias, sa Basahon ni Santiago, Juan, Lucas, Marcos, Mateo, sa Basahon sa Pinadayag, og sa tanan Nimong mga Basahon, nga haduol na kami sa katapusan. Ug gipaatabang pud namo ang among nawong ngadto sa Langit, diha sa pag-ampo, sa mga pagpangaliyupo, aron masayran kon asa na kami nagkinabuhi, Ginoo. Hinay-hinay na namong nakita ang pagbanagbanag sa adlaw. Ug, Ginoo, nagaduol kami Kanim. Ang among pagtoo nakasentro gyud Kanim karon. Ginasalikway ang tanang kabug-at, ang tanang sala, ang tanang diyutay'ng dili-pagtoo nga sa dakung kasayon nagapiit paglikos kanamo, nagapadayon kami karon ngadto sa dauganan sa langitnong pagtawag, ingon nga hingsayran namo nga ang among panahon limitado ra gayud.

<sup>167</sup> Panalangini kini nga mga tawo dinhi, Ginoo. Ginahigugma Ikaw nila. Imoha sila. Mitambong sila. Pero Ikaw Mao ang nagapadayag. Ginaampo namo nga itugot Mo kining mga butanga nganhi kanamo samtang nagahulat kami Kanim.

<sup>168</sup> Hatagi kami og usa ka maanindot nga hapon sa pagtuon, Ginoo. Hatagi kami og pagsabot. Pabalika kami unyang gabii, pag-usab. Ginoo, dihogi ako unyang hapon, oh, samtang magatuon ako, Ginoo, para niining unom-ka-pilo nga hinungdan sa pagduaw ni Gabriel. Kung miduaw si Gabriel ug mihatag og unom-ka-pilo nga kahulogan, Ginoo, nan kinahanglan namong masayran kana. Natun-an namo pinaagi sa mga Basahon ug nasayran nga haduol na kami. Busa ginaampo namo nga ipadayag Mo kini kanamo unyang gabii.

<sup>169</sup> Sunod Domingo, Ginoo, Oh Dios, ipahimutang kana nga mga adlaw dinha. Wala ako mahibalo kung unsaon, pero Ikaw man ang makadala kanamo sa mismong panahon. Itugot kini, Amahan. Nagasalig kami Kanim. Ginahigugma namo ang usa'g usa ug ang Dugo ni Jesus Cristo, nga Anak sa Dios, ang naglimpyo kanamo sa tanang sala. Nagasalig kami Kanim karon. Tabangi intawon kami samtang nagahulat kami Kanim, Amahan, pinaagi ni Jesus nga among Ginoo. 

61-0730M Ang Mga Sugo Ni Gabriel Kang Daniel  
Branham Tabernacle  
Jeffersonville, Indiana U.S.A.

CEBUANO

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)